

摘藻堂四庫全書薈要

史部

欽定四庫全書薈要

史部

御批通鑑綱目卷二上

詳校官編修臣汪鏞

欽定四庫全書蒼要卷七千三百五

史部

御批資治通鑑綱目卷二上

起丙午盡戊戌西楚

考異

提要丙午下有秦昭襄王五十二年戊戌下無西楚

霸王四年漢王四年

霸王

凡五十三年

秦昭襄王五十二楚考烈王八燕孝王三魏安釐王

年二十二趙孝成王十一韓桓惠王十八齊王建十年

○凡考證謹按司馬公通鑑秦自是年繼周漢自高祖

七國考證元年繼秦晉自泰始元年繼魏唐自武德元

年繼隋綱目則秦起於始皇帝并六國之後漢起於滅

楚之後晉起於平吳之後唐起於平羣盜之後如隋則

綱目與通鑑同起於開皇九年平陳之後是謂之正統

古昔帝王之御天下也典禮命討皆原於天尊卑有分

內外有制立綱振紀人不敢紊是以六經不言正統
自正也周衰聖賢不作綱淪法斁禮廢樂崩馴至疆秦
入寇王室七國均敵不相統一後若南北朝五代各據
一方帝制自為天下無主不得已同謂之無統大儒述
作之義在於貴正統而賤無統
故曰是書後之君子必有取焉

書法

按通鑑自是歲揭秦紀而大書之蓋周既亡
而以秦繼也周亡而秦繼之則綱目大書其
年可矣此其與列國分註何天下未一也天下未
一秦亦列國耳必至於始皇二十六年秦并天下
始以正統例大書之此綱目所以大一統也故
曰統正於下而人道定矣漢晉唐初皆倣此

秦丞相范雎免

秦河東守王稽坐與諸侯通棄市王臨朝而歎應侯
請其故王曰武安君死而鄭安平王稽等皆畔內無

良將外多敵國吾是以憂應侯懼不知所出燕客蔡澤聞之西入秦先使人宣言於應侯曰蔡澤見王必奪君位應侯召澤讓之澤曰吁君何見之晚也夫四時之序成功者去商君吳起大夫種何足願與應侯謬曰何為不可君子有殺身以成名死無所恨澤曰身名俱全者上也名可法而身死者次也三子之可願孰與閔天周公哉語曰日中則移月滿則虧進退贏縮與時變化今君怨已讐而德已報意欲至矣而無變計竊為君危之應侯曰善遂薦澤於王因謝病免王悅澤計以為相數月免

集覽

商君衛之

庶公子名鞅事秦孝公封於商故號商君孝公卒惠公車裂之吳起衛人為楚悼王相悼王死大臣作亂攻殺起大夫種種上聲名也姓文字子禽楚之郢人事越王勾踐為大夫後被殺何足願與與平聲語末辭也本傳作其卒然亦可願與閔天周公閔天姓名周文王武王之臣周公名旦武王弟又為成王相二

人者身名質實俱全者也

一統志云吳起衛人嘗學於曾子好用兵為魯將破齊復為魏將擊秦魏

武侯善之為西河守大振聲名既而見疑適楚悼王聞其賢以為相於是撫養士卒平越取陳却晉伐秦諸侯畏楚之強大夫種春秋時越大夫也吳王夫差敗越兵于夫椒越王勾踐使種行成于吳勾踐既歸國屬政于種及滅吳種謀居多後以范蠡遺書稱疾不朝或譖種將作亂王賜以屬鏤之劍遂伏劍死周公姬姓文王之子世居岐山生有聖德輔武王伐紂以安天下又輔成王制禮作樂以成周家之治

書法

免例有三書某人免者可免者也著所坐者有罪者也書免某人官下某人獄免徵下獄

免者無罪者也

發明

范雎傾險之士然能知止而退亦有足取故書免而不去其官

楚以荀况為蘭陵令

荀卿趙人春申君以為蘭陵令荀卿當與臨武君論兵於趙孝成王前王曰請問兵要卿對曰要在附民夫仁人之兵上下一心三軍同力臣之於君也下之於上也若子弟之事父兄若手臂之扞頭目而覆胷腹也故兵要在於附民而已齊人隆技擊得一首者賜贖錙金無本賞矣事小敵義則偷可用也事大敵堅則渙然離耳是亡國之兵也其去賃市傭而戰之幾矣魏氏之武卒以度取之衣三屬之甲操十二石之弩負矢五十置戈其上冠胄帶劍贏三日糧日中而趨百里中試則復其戶利其田宅氣力數年而衰而復利未可奪也改造則不易周也故地雖大其稅必寡是危國之兵也秦人其生民也陘隘其使民也酷烈忸之以慶賞黷之以刑罰使民所以要利於上者非闕無由也使以功賞相長五甲首而隸五家是最

為衆彊長久之道然皆干賞蹈利之兵未有安制綦
節之理也故齊之技擊不可以遇魏之武卒魏之武
卒不可以遇秦之銳士秦之銳士不可以當桓文之
節制桓文之節制不可以敵湯武之仁義故招延募
選隆勢詐尚功利是漸之也禮義教化是齊之也故
兵大齊則制天下小齊則制隣敵若夫招延選募隆
勢詐尚功利之兵則勝不勝無常相為雌雄耳夫是
之謂盜兵君子不由也王曰善請問為將卿曰號令
欲嚴以威賞罰欲必以信處舍欲周以固徙舉進退
欲安以重欲疾以速窺敵觀變欲潛以深欲伍以參
遇敵決戰必行吾所明無行吾所疑夫是之為六術
無欲將而惡廢無怠勝而忘敗無威內而輕外無見
利而不顧其害凡慮事欲熟而用財欲泰夫是之謂
五權可殺而不可使處不完可殺而不可使擊不勝
可殺而不可使欺百姓夫是之謂三至凡百事之成
也必在敬之其敗也必在慢之故敬勝怠則吉怠勝

敬則滅計勝欲則從欲勝計則凶戰如守行如戰有
功如幸慎行此六術五權三至而處之以恭敬無曠
夫是之謂天下之將臨武君曰善請問王者之軍制
卿曰將死鼓御死轡百吏死職士大夫死行列聞鼓
聲而進金聲而退順命為上有功次之不殺老弱不
獵田稼服者不禽格者不赦犇命者不獲凡誅非誅
百姓也誅其亂百姓者也百姓有捍其賊者是亦賊
也故順刃者生徠刃者死犇命者貢有誅而無戰不
屠城不潛軍不留衆師不越時故亂者樂其政不安
其上者欲其至也臨武君曰善陳囂問曰先生議兵
常以仁義為本然則又何以兵為哉卿曰仁者愛人
故惡人之害之也義者循理故惡人之亂之也故兵
者所以禁暴除**集覽**荀卿趙人名況時人相尊號之
害也非爭奪也**日**卿後避漢宣諱號曰孫卿臨
武君荀子注臨武君楚將也未知姓名或曰劉向序
云荀卿至趙與孫臏議兵孝成王前孫臏即臨武君

也今按史記年表齊宣王二年孫臏為軍師敗魏人於馬陵至趙孝成王元年已七十餘年年代相遠疑臨武君非孫臏也隆技擊隆尚也以勇力擊斬敵者號為技擊孟康曰兵家之技巧者習手足便器械積機關以立攻守之勝者無本賞本賞謂有功同受賞也斬首雖戰敗亦賞不斬首則雖戰勝亦不賞是無本賞也事小敵毳毳讀曰脆若遇小敵而敵毳則可偷竊而用此技其去賃市傭而戰之幾矣此與賃市傭作之人而使之戰者相去幾何以度取之取其材力長短中度者三屬之甲屬音注甲札之數也如淳曰上身一髀一脰繳一凡三屬上身者上體之甲髀股也禪音昆褻衣以蔽股名髀禪也脰脰也脰乃脰端繳行膝也以繳脰端名脰繳也皆相連屬也又七屬甲注見唐德宗建中三年贏三日糧贏音盈負也又負三日糧食日中而趨百里謂負重而趨一日之中可行百里中試則復其戶利其田宅中去聲

復音福試中其技則復除戶役給其便利之處不征徭也改造則不易周改造更選擇也則又如前其稅必寡優復既多則賦稅寡少無所資用忸之忸音狃習也戰勝則厚賞使習以為常鱖之鱖藉也不勝則以刑罰凌藉之五甲首而隸五家戰獲五甲首則得役隸其鄉里之五家安制綦節綦音綦極也楊倞曰安制謂安於制度自不踰越極於中義心不為非之理漸之謂漸進而近於法未為理也處舍欲周以固處舍營壘也周密牢固則敵不敢陵奪安以重舉動進退之法靜則安重而不為輕舉疾以速動則疾速而不失機權潛以深使間諜以觀敵國當潛隱深入伍以參伍參錯雜也錯雜於敵中而盡知其事所明所知處所疑疑危處六術自上文號令至遇敵此六術無欲將而惡廢惡去聲無求進而惡退無怠勝而忘敗無既勝則或怠而至於敗亡用財欲泰謂不當恡賞五權此五者乃為將之權謀可殺而不可使處

不完所處必須完固若處不完之地已寧可自殺三
至此三者謂之至言其守而不變也將死鼓將當死
於鼓之下左傳師之耳目在吾旗鼓御死轡御車者
當死守轡策不獵田稼獵與蹠同蹠踐也服者不禽
不戰而退者不追禽之格者不赦捍拒格鬪者必殺
無赦犇命者不獲犇與奔通奔走來歸命者不獲之
為囚俘係刃者死荀子係本作蘇注蘇讀為係向也
犇命者貢取歸命者貢獻於上將不屠城屠城謂毀
其城而殺其民若宰六畜然不潛軍言用軍無所潛
伏不留衆不久留師衆使暴露於野外不安其上者
謂不安其亂國之政者欲其至也 **正誤** 可殺而不可
樂其來征也猶東征西夷怨之意 **正誤** 使處不完今

按此謂將若有罪寧可殺之不可使處不完之
地而致兵敗傷衆也奔命者貢今按貢于國君 **質實**
一統志云荀卿趙人仕楚為蘭陵令著書數萬言羽
翼六經有荀子書傳流於世蘭陵縣名注見漢光武

建武四年

書法

綱目非大封拜不書此令耳何以書錄賢也而以之者為可譏矣其譏何賢也而止以為

令非其所矣終綱目書以為令十有二是年荀況漢元帝永光元年張猛晉孝武太元十六年范弘之隋文帝開皇二十年王如唐太宗貞觀十四年韋元方中宗嗣聖九年狄仁傑二十一年戴令言玄宗開元二年徐愉德宗貞元十九年韓愈憲宗元和十四年裴潯穆宗長慶元年楊汝士懿宗咸通五年劉蛻惟王伽徐愉為非譏也

周民東亡秦取其寶器遷西周公於羆狐之聚集覽

羆狐

地名羆音憚徐廣曰羆狐聚近陽人聚在洛陽南百五十里括地志云汝州之外古梁城即羆狐聚質實

一統志云愚狐聚名在河南府城外五十里梁新城之間秦取九鼎遷西周公于此○楚人遷魯

于莒而取其地

丁秦五十三楚九燕王喜元魏二年秦伐魏取吳城○韓未十三趙十二韓十九齊十一年

王入朝於秦

書法

書入朝何秦益彊也自威烈至周亡韓未嘗書來朝於是書入朝於秦罪韓也六國韓最

先朝秦而秦亦最先滅之然則自卑以媚敵者果不足以自免矣自是七國始書王周已亡也

發明

戰國諸侯自稱王以後綱目例皆書君所以不予其僭也今此又復書韓王何哉是時周

赧既亡上無天子故諸侯因其稱王而書之亦所以著其僭爾然韓既稱王乃書入朝於秦烏有身

為王者乃奔走朝事他國者哉據事直書義自見矣

○魏舉國聽令於秦

戊申四
秦五十
趙十三
楚二十
燕二十
齊十二
年
秦王郊見上帝於雍

發明

郊見天子之禮也春秋魯郊聖人因事屢書而譏之或者以為周賜以天子禮樂故魯得

郊祀然夫子乃曰魯之郊禘非古也周公其哀矣孔子魯之臣子其不滿于魯若此況西戎之秦乎秦自襄始受封已僭祀西時至文宣靈廊密上下用事四帝揚雄所謂僭莫僭於祭祭莫重於天者是也今上書韓王入朝魏舉國聽令下書郊見上帝於雍蓋明著其既服諸侯益肆其僭侈之志云爾異時呂政吞滅諸國毒痛四海方且行封禪祠諸神然不二世遽滅帝果私於秦哉嗚呼吾誰欺

欺天乎曾謂太山不如林放乎
後之僭祀徼福者可以觀矣

○楚遷于鉅陽

已秦五十五楚十一燕三魏二十
酉五趙十四韓二十一齊十三年魏人殺衛君而立其

弟

弟魏壻也

庚秦五十六楚十二燕四魏二十
戌六趙十五韓二十二齊十四年秋秦王稷薨太子柱

立韓王哀經入弔祠考異

提要漏柱字

書法

七國始書薨周亡也周亡綱目王七國則曷為不書崩書薨分王也書薨足以異之矣綱

目不皆薨立六王必有事而後書惟秦悉書之詳秦世也自是秦有大事必書時若月

發明

天王崩諸侯未有奔赴者秦韓均為諸侯而行弔若此則亦視勢之強弱而不顧禮之當

否爾韓之卑屈如此將以求媚於秦然不免首為秦人所滅故綱目於其入弔之事大書於冊所以戒有國之君不可不自彊於善而毋徒媚敵以乞憐也或曰韓以微弱之國不得不爾是不然湯以七十里文王以百里萬一迫於彊大不能自立則有國君死社稷之義效死勿去死于宗廟可也謂之何哉

○燕伐趙趙敗之遂圍燕

燕王使栗腹約驩於趙反而言曰趙壯者死長平其孤未壯可伐也王使腹將而攻鄣將渠曰與人通關約交使者報而攻之不祥師必無功王不聽自將偏軍隨之將渠引王之綏王以足蹴之將渠泣曰臣非

自為為王也王不聽遂行趙使廉頗擊之敗其兩軍
逐北五百里遂圍燕燕人請和趙人曰必令將渠處
和燕王以將渠為相

集覽

栗腹姓名腹本作股
將渠姓名將即郎反質實

一統志云鄆春秋晉邑名戰國屬趙漢為鄆縣屬常
山郡光武即位於鄆南改曰高邑為冀州刺史治所
晉屬趙國後魏屬趙郡隋屬樂州唐屬趙州宋屬
慶源府金屬沃州元屬趙州國朝因之屬真定府

趙公子勝卒考異

提要無趙公子勝卒五字

辛秦孝文王柱元楚十三燕五魏二
亥十七趙十六韓二十三齊十五年冬十月秦王薨子

楚立考異

例王下當有柱字今按昭襄王薨書名據崩葬
例曰無統之君稱王公者曰某王公某薨此

闕柱字蓋
刊本漏也

考證

當作秦王柱薨○謹按凡例曰凡無統
稱王公者曰某王公某薨故名存者皆

當補書
後倣此

孝文王即位三日而薨子楚立尊華陽夫人為華陽太后夏姬為夏太后

書法

秦王
柱也

燕伐齊拔聊城齊伐取之

燕將攻齊聊城拔之或譖之燕王燕將保聊城不敢歸齊田單攻之歲餘不下魯仲連乃為書約之矢以射城中遺燕將曰為公計者不歸燕則歸齊今獨守孤城齊兵日益而燕救不至將何為乎燕將見書泣三日猶豫不能決遂自殺聊城亂田單克之歸言仲連於齊王欲爵之仲連逃之海上曰吾與富貴而詘於人寧貧賤而輕世肆志焉魏王問天下之高士於子順子順曰世無其人也抑可以為次其魯仲連乎

集覽

聊城徐廣曰在平原括地志云故聊城在博州聊城縣西二十里春秋齊西界聊攝戰國時亦

齊地秦漢皆為東郡之聊城約之矢高誘曰纏束書於矢上猶豫顏師古曰猶獸名性多疑聞有聲則豫登木下上不一故謂不決曰猶豫索隱曰猶鄒音以獸反禮記作猶與注與音豫崔浩云猶猿類仰鼻長尾性多疑故以此不決者按狐性亦多疑渡水而聽冰聲故云狐疑今解者又引老子與兮若冬涉川猶兮若畏四隣故以為猶與且按狐聽冰而此云與兮冬涉川則與定是狐類不疑若畏四鄰則猶定是獸自不保同類故云畏四鄰也又狐疑注見秦二世三年富貴而訕於人記儒行曰不充訕於富貴注充訕喜失節之貌訕音求勿反又丘勿反輕世肆志輕世眇視視天下也肆志放縱志意也正誤富貴於人今按訕與屈質實一統志云聊城古邑名本春秋時聊攝地戰國時屬齊秦

置聊城縣屬東郡漢因之魏晉俱屬平原郡北齊改屬濟州隋初屬平原郡尋於此置博州後州省以縣屬武陽郡唐為博州治五代周省武水縣入焉宋金元俱仍舊國朝因之改屬東昌府

壬秦莊襄王楚元楚十四燕六魏二子十八趙十七韓二十四齊十六年秦以呂不韋為相

國封文信侯○秦滅東周遷其君於陽人聚考異

按昭襄王

五十二年書遷西周公定字陳氏曰綱目書東西周之亡而不書二周之分疑漏

東周君與諸侯謀伐秦王使相國帥師滅之遷東周君於陽人聚周遂不祀周比亡凡有七邑集覽

陽人地理志河南梁縣有陽人聚括地志云陽人故城在汝州梁縣西四十里質實

一統志云陽人

聚在南陽府汝州西秦遷東周於此吳孫堅大破董卓軍亦此地

秦伐韓取滎陽成臯置三川郡集覽

滎陽縣名屬河南古虢國也今鄭州

是成臯縣名屬河南戰國鄭虎牢關也括地志云故城在洛州汜水縣西南二里三川秦三川郡漢高改河南

郡韋昭曰洛陽有伊洛河三水故名焉陽休之說涇渭洛亦為三川質實一統志云滎陽古邑名本古東

虢國春秋時為鄭京城秦置敖倉於此漢始置滎陽縣屬河南郡其治在今縣西五十里晉置滎陽郡後魏郡

縣並徙今治北齊改郡曰成臯隋廢郡存縣唐析置武泰縣屬洛州神龍初復省入滎陽縣屬鄭州五代宋金

元俱仍舊國朝因之屬開封府成臯古邑名本東虢國地春秋時為鄭巖邑又名虎牢秦屬三川郡漢置成臯

縣屬河南郡東漢廢縣為關三國魏復置縣晉屬河南郡劉宋於此置司州後魏北豫州及成臯郡同治於此

隋始改縣曰汜水屬滎陽郡唐初析置成臯縣貞觀中又省入汜水屬鄭州後屬孟州宋初屬洛州元豐初復

屬孟州金屬鄭州元仍其舊國朝因之屬開封府三川
秦之郡名即周之王城下都也漢置河南郡東漢都於
此置河南尹三國魏置司州晉亦都此置河南尹苻秦
改為豫州劉宋仍置司州後魏改為洛州徙都之又改
司州亦為河南尹後周改為東京隋煬帝徙都於此改
豫州唐初復為洛州置都督府高宗改為東都尋改神
都天寶初又改東京五代梁為西都唐改東都晉改西
京宋因之金置德昌軍號中京置金昌府元為河南路
國朝改為河南

○楚滅魯遷其君於卞為家人集覽卞

府屬河南道

國有卞縣括地志云兗

質實

一統志云卞春秋魯邑名
卽古卞明國也戰國時屬

州泗水縣本漢卞縣地

楚後屬秦漢置卞縣屬魯國晉屬魯郡隋改為泗水縣
屬兗州唐宋金因之元省入曲阜尋復置屬兗州國朝

因之改屬
兗州府

是為
頃公

癸秦二楚十五燕七魏二十九日食○秦伐趙定太原

取三十七城集覽

太原注見齊明帝建武三年并州

○楚黃歇徙封於

吳

春申君言於楚王曰淮北邊於齊其事急請以為郡而封於江東許之春申君因城故吳墟而居之宮室

極盛集覽

城故吳墟春申君傳注正義曰闔閭今蘇州也於城內小城西北別築城居之今圯毀也

又大內北瀆四從五橫至今猶存又改破楚門為昌門

質實

一統志云故吳墟在蘇州府城內西

南按春申君傳注云黃歇初封於吳於闔閭城內小城西北別築城居之今圯毀也又大內北瀆四從五

橫至今
猶存焉

書法

黃歇徙封何歇意也綱目誅意故
不書楚徙封黃歇書黃歇徙封

甲秦三楚十六燕八魏三十趙
寅十九韓二十六齊十八年
秦悉拔上黨諸城置太

原郡

書法

自上黨降趙於是十有七年凡五書太原上
黨其書之何上黨天下之脊也秦得上黨而

并天下之勢成
矣故謹書之

○秦伐魏魏公子無忌率五國之師敗之追至函谷而

還

蒙驚伐魏取高都汲魏王患之使人請信陵君信陵君不肯還其客毛公薛公見曰公子所以重於諸侯者徒以魏也今魏急而公子不恤一旦秦克大梁夷先王之宗廟公子當何面目立天下乎語未卒信陵君色變趣駕還魏魏王持信陵君而泣以為上將軍求援於諸侯諸侯聞之皆遣兵救魏信陵君遂率五國之師敗蒙驚於河外追至函谷關而還○安陵人縮高之子仕於秦守管信陵君攻之不下使人召高將以為五大夫執節尉而使攻管高對曰父攻子守人之笑也見臣而下是倍主也父教子倍亦非君之所喜敢辭信陵君怒使謂安陵君生束縮高而致之不然無忌將率十萬之師以造城下安陵君曰吾先君成侯受詔襄王以守此城也手受太府之憲其上篇曰子弑父臣弑君有常不赦國雖大赦降城亡子不得與焉今縮高辭大位以全父子之義而君曰必生致之是使我負襄王之詔而廢太府之憲也縮高

聞之曰信陵君為人悍猛而自用此辭反必為國禍
吾已全已無違人臣之義矣豈可使吾君有魏患乎
乃之使者舍劍頭而死信陵君聞

集覽

蒙驚齊人蒙武之父蒙恬

之祖也驚音遨鄭氏音五到反高都魏邑名括地志
云高都故城今河內澤州是汲魏邑名即河內郡也
括地志云故汲城在衛州汲縣地河外謂陝華二州
也正義曰河外者河南岸也魏州地管縣名屬滎陽
括地志云今鄭州管城縣外城古管國城也此辭反
為句言與理相反縞素辟舍喪服而不居正寢也信
陵以縮高因以非理召之而自殺故以示自貶記王
藻曰縞冠素紕既祥之冠也閒傳曰素縞麻衣鄭玄
注此素縞者王藻所云縞冠素紕也紕純緣邊也穀
梁傳成五年輦者曰君親素縞注素衣縞冠凶服也
釋曰鄭云以素純喪冠故謂之素縞今注與鄭異也
離騷九章曰思久故之親身兮因縞素而哭之注縞

素白綴

正誤

此辭反必為國禍今按此辭反為還報也信陵君遣使謂安陵君生致縮高不

然將伐之安陵君不從而曰云云故縮高言使

質實

者以辭還報信陵君必伐安陵是為國禍也
一統志云高都古邑名春秋時屬晉戰國時屬韓後
屬趙秦置高都縣屬上黨郡漢因之後魏置建興郡
治此北齊改置高都郡後周廢為高都村故城在澤
州城東三十里汲古邑名本殷牧野之地春秋時屬
晉戰國時屬魏後屬秦漢置汲縣屬河內郡魏屬朝
歌郡晉為汲郡治後魏置伍城郡及縣周以縣屬衛
州隋復改為汲縣屬汲郡唐徙衛治此宋元俱仍舊
國朝因之改屬衛輝府安陵春秋鄭邑名鄭伯克段
于鄆即此戰國謂之安陵漢始置鄆陵縣屬潁川郡
東魏屬許昌郡北齊省入許昌縣隋復置屬許州唐
因之宋屬開封府金元俱因之國朝仍屬開封府管
古邑名周封管叔鮮于此為管國春秋時屬晉後屬

經秦置管縣屬三川郡漢屬河南郡晉宋因之後魏
於縣置滎州改屬滎陽郡後周改為鄭州隋改為管
州唐降為管城縣為鄭州治所宋金元俱仍其舊
國朝省入鄭州故城在開封府城西一百八十里

書法

追至函谷何惡秦也秦伐之不得志於是再
書矣自昭襄以來山東之得志有三田文之

伐書河渭絕無忌之救書大破秦軍於是書追至
函谷雖終無救於亡而綱目每喜書之則亦惡秦
而已矣

五月秦王薨子政立考異

提要王下有楚字此亦
刊本闕漏與孝文王同

政生十三年矣國事皆委於文信侯號仲父胡
氏曰孝文莊襄二王之死蓋皆不韋之所為也

書法

秦王楚也秦自書薨以來未有不名者其不
名柱與楚何疑也何疑乎柱楚不韋欲政之

王久矣而二王之享國皆不永以是為可疑故異其文異其文者異其事也然則趙王丹楚王悍亦不稱名何也六國之事故多略之矣

乙秦王政元楚二十七燕九魏三十
卯一趙二十韓二十七齊十九年秦鑿涇水為渠

韓欲疲秦使無東伐乃使水工鄭國為間於秦鑿涇水自仲山為渠並北山東注洛中作而覺欲殺之國曰臣為韓延數年之命然渠成亦秦萬世之利也乃使卒為之注填關之水既烏鹵之地四萬餘頃收皆畝一鍾由是

集覽

涇水地理志涇水出安定涇陽縣西合原州百泉縣斧頭山也東南

至馬翊陽陵縣與渭水合又東與漆沮水合經秦漢之都至潼津入河仲山河渠書作中山顏師古曰中音仲即今九嵕山之東中山也括地志云中一名仲山在雍州雲陽縣西十五里並北山東注洛並與傍

通音蒲良反近也倚也河渠書注徐廣曰出馮翊懷德縣填關之水填音田塞也關依據反或作塹通作淤說文澱滓濁泥舄鹵之地河渠書作澤鹵之地索隱曰澤一作舄音昔本或作斥則如字讀之書傳注許慎曰東方謂之斥西方謂之鹵斥鹵鹹地可煮為鹽

正誤

舄鹵今按舄本作瀉鹹土也周禮草

人鹹

質實

一統志云涇水自平涼府城西南白巖發源至涇州又東南至邠州界又東北至西

安府高陵縣界會于渭仲山在西安府涇陽縣西北七十里俗傳漢高祖兄仲所居於此故號焉上有仲子廟歲旱圍此射獵則有風雨

書法

鑿渠必書重民利也書溝渠始此終綱目書渠十是年漢武帝元光六年渭渠太始二年

白渠明帝永平十三年汴渠後主延熙四年曹魏漕渠隋甲辰廣通渠煬帝大業元年通濟渠四年

永濟渠唐玄宗天寶元年三門運渠
後周戊午汴渠邳溝刁溝不與焉

丙秦二楚十八燕十魏三十二趙
辰二十一韓二十八齊二十年
趙王薨廉頗犇魏考

異據崩葬例當書趙王
丹薨亦刊本漏也

趙使廉頗伐魏取繁陽孝成王薨悼襄王立使樂乘
代頗頗怒攻之遂出犇魏魏不能用趙師數困王復
思之使視頗尚可用否頗之仇郭開多與使者金令
毀之頗見使者一飯斗米肉十斤被甲上馬以示可
用使者還報曰廉將軍老尚善飯然與臣坐頃之三
遺矢矣王遂不召楚人迎之頗一為楚將無功曰我
思用趙人
集覽
繁陽徐廣曰屬魏郡正義曰在相州
遂卒於楚
內黃東北三遺矢史記注索隱曰謂
數起便也
質實
一統志云繁陽古邑名春秋時屬晉
矢一作屎
戰國時屬魏秦置縣屬魏郡漢省之

故城在大名府內
黃縣東六十里

丁秦三楚十九燕十一魏三十三趙悼
已襄王偃元韓二十九齊二十一年

秦大饑考異提

漏秦
字

書法

書大饑始此終綱目書大饑二十六是年辛
未趙漢武帝建元三年元帝永光元年莽甲

戌辛巳漢光武建武二年安帝永初三年再書晉
惠帝元康四年永興二年愍帝建興二年襄國元
帝大興二年穆帝永和十年秦孝武太元四年秦
六年十二年涼州安帝元興元年梁丙辰魏唐初
戊寅涼唐中宗嗣聖四年玄宗天寶十三載肅宗
上元二年德宗興元元年癸卯晉甲寅湖南書饑

二十
九

○秦伐韓取十二城○趙李牧伐燕取武遂方城

李牧者趙北邊之良將也嘗居代鴈門備匈奴以便
宜置吏市租皆輸莫府為士卒費日擊數牛饗士習
騎射謹烽火多間諜為約曰匈奴入盜則急收保有
敢捕虜者斬如是數歲無所亡失匈奴皆以為怯雖
趙邊兵亦以為吾將怯趙王使人讓之牧如故王怒
使人代之屢出戰不利邊不得田畜王復請李牧牧
稱病不出王彊起之牧曰必用臣臣如前乃敢奉令
王許之牧至邊如約匈奴數歲無所得終以為怯士
日得賞賜而不用皆願一戰乃選車騎習戰大縱畜
牧人民滿野匈奴小入佯北以數十人委之單于聞
之大率眾入牧乃多為奇陳張左右翼擊之大破殺
匈奴十餘萬騎滅襜褕破東胡降林胡單于奔走十
餘歲不敢近趙邊先是時天下冠帶之國七而秦趙
燕近於邊塞諸戎亦各分散自有君長莫能相一其

後義渠築城郭以自守而秦滅之始於隴西北地上
郡築長城以拒胡趙破林胡樓煩築長城自代並陰
山下至高闕為塞而置雲中鴈門代郡燕破東胡却
地千里亦築長城自造陽至襄平置上谷漁陽右北
平遼東郡及戰國**集覽**武遂方城地理志武遂屬河
之末而匈奴始大**集覽**間國方城屬廣陽郡括地志
云武遂易州遂城也方城在幽州固安南十七里代
鴈門正義曰鴈門縣在代地故云代鴈門漢代郡城
古代國也秦置鴈門郡在蔚州飛狐北百五十里匈
奴黃帝本紀北逐葷粥注索隱曰葷粥匈奴別名唐
虞以上曰山戎亦曰獯鬻夏曰淳維殷曰鬼方周曰
玁狁秦漢曰匈奴魏隋唐皆曰突厥莫府如淳曰莫
大也將軍征行無常處所在為治故言莫府莫或作
幕晉灼曰衛青征匈奴帝就拜大將軍於幕中府故
曰幕府顏師古曰二說皆非按幕府者以軍幕為義
古字通用廉頗李牧市租皆入幕府此則非因衛青

始有其號又莫大之義乖索隱曰古者出征以幕帳
為府署也邊不得田畜為句正義曰畜許又反單于
匈奴天子之號猶華言皇帝也漢書音義曰單于者
廣大貌言其象天單于然也單音蟾襜襜音檐藍徐
廣曰檐襜一作臨駟如淳曰胡名也在代地東胡注
見周報王八年林胡西胡國名括地志云在朔州嵐
州以北春秋北地地如淳曰林胡即檐林為趙武靈
王所滅隴西地理志雍州隴西郡今隴右也括地志
云隴山名郡在山西故名隴西上郡屬古并州今廊
州是括地志云故城在綏州上縣東南五十里按丹
廊延綏等州北至勝州固陽並係上郡地魏築長城
界陰山地理志西河郡陰山縣括地志云陰山北戎
地在朔州北塞外東西千餘里草木茂盛匈奴依阻
其中漢武克匈奴置陰山縣正義曰今勝州是山在
五原郡西安陽縣北高闕徐廣曰在五原郡北括地
志云朔方郡臨戎縣北有連山險於長城其山中斷

兩峯極峻相對若闕故名焉雲中今大同府古雲中
郡也嵐勝等州皆是其地括地志云故城在勝州榆
林縣東北造陽晉太康地記秦塞自五原郡北九里
地名造陽匈奴傳曰漢亦棄上谷郡之斗辟縣造陽
地以與胡顏師古曰斗絕也縣之斗曲入匈奴界者
其中造陽地也辟讀曰僻襄平城名也韋昭曰今遼
東所理上谷今媯州是在古幽州西北羅璧識遺曰
燕北百里外有居庸關關東二百里外有虎北口即
古上谷郡漁陽幽州漁陽郡括地志云故城在檀州
密雲縣南十八里漁水之北今薊州是右北平漁陽
郡東南七十里有北平城即漢右北平也遼東今
遼陽府是周封箕子於朝鮮漢置樂浪等四郡地
誤邊不得田畜今按畜當作許六切養牲也
下文大縱畜牧音同亦謂畜養牧放也
質實一

志云武遂古邑名戰國時屬燕後屬秦漢置武遂縣
屬河間國東漢屬安平國晉析置武強縣屬長樂國

後魏屬武邑郡隋初以武遂省入屬信都郡唐屬深
州後屬冀州宋金俱屬深州元置東武州尋廢州以
縣屬深州後屬祁州中統初改屬晉州國朝因之
屬真定府方城古邑名戰國時屬燕後屬秦漢置方
城縣屬廣陽國後屬涿郡後魏省隋置固安縣屬幽
州唐屬北義州貞觀初復屬幽州金屬涿州元屬霸
州後陞為固安州國朝改為固安縣屬順天府代
古郡名春秋時屬晉戰國時屬趙秦置代縣屬代郡
漢封代王於此為代國東漢末廢後魏於此置靈丘
郡後周兼置蔚州隋郡廢州存大業初州廢唐復置
蔚州治靈丘至德初改安邊郡後復為蔚州遼置忠
順軍金為蔚州元至元初省州為靈仙縣屬弘州尋
復為州屬宣德府國朝因之屬大同府鴈門本山
名春秋時屬晉戰國時屬趙秦置郡於山下故名焉
漢徙治陰館縣三國魏徙治廣武縣後周移肆州治
此隋初郡廢置代州及改廣武曰鴈門縣大業中改

州為鴈門郡唐改代州天寶初改鴈門郡乾元初復為代州宋因之金置震武軍元罷軍仍為代州以鴈

門縣省入隸太原路國朝初改為代縣後復改為

州仍屬太原府隴西秦之郡名即西羌所居之地漢

因之治狄道縣晉析置狄道郡劉宋置武始郡後魏

置臨狄郡後周廢隋復置武始郡屬蘭州後改金城

郡唐天寶初置臨州乾元中置臨洮軍寶應初陷于

吐蕃號武勝軍宋復改為臨洮軍尋改熙州治狄道

縣金改熙州為臨洮府元仍為臨洮府國朝因之

屬陝西道北地秦之郡名即義渠戎所居之地漢改

為泥陽縣東漢屬安定郡後魏於此置華州又改邠

州西魏改寧州合之曰邠寧後周分置趙興郡隋改

為北地郡唐為寧州又改彭原郡宋復為寧州宣和

初置興寧軍金屬慶源路元屬鞏昌路國朝因之

屬慶陽府上郡秦之郡名即白翟戎所居之地漢改

為雕陰縣晉為赫連勃勃所居後魏於此置上郡又

分置綏州隋改為上郡大業初廢州置雕陰郡唐初為綏州天寶中改上郡乾元初復為綏州宋為綏德城元符初置綏德軍金改為州元仍其舊國朝因之屬延安府陰山在鞑靼國東西千餘里草木茂盛多產禽獸漢時冒頓單于依阻其中治作弓矢漢武帝奪其地匈奴入寇無所隱過此未嘗不哭高闕塞名在大同府城西北四百二十里古豐州河之西史記趙武靈王築長城自代並陰山下至高闕即此塞是也雲中古地名春秋時北狄所居戰國時屬趙秦為雲中郡漢因之東漢末郡廢三國魏屬新興郡晉改屬鴈門郡後魏徙都平城置司州牧及置代尹又置北恒州後周並廢隋以其地屬代朔雲三州唐初復置北恒州治雲中縣尋廢開元中置雲州天寶初改雲中郡乾元初復為雲州五代唐以雲州置大同軍節度遼陞為西京府曰大同金因之元改置大同路本朝改為大同府隸山西道襄平古邑名戰國時

屬燕後屬秦漢置襄平縣為遼東郡治所晉廢之遼
改為遼陽縣金元俱因之本朝改為定遼中衛屬遼
東行都司上谷古地名春秋戰國時皆屬燕秦為上
谷郡漢置涿鹿縣魏晉時地屬北燕唐改涿鹿為永
興縣置新州五代唐置團練使總山後八軍同光初
陞威塞軍遼會同初改奉聖州武定軍金大安初陞
德興府元初因之後復為奉聖州屬宣德府本朝
改為保安州直隸京師漁陽古邑名春秋及戰國時
皆屬燕秦置漁陽郡漢因之魏晉屬幽州隋初徙玄
州於此後復置漁陽郡唐置薊州取古薊門關以名
天寶初改漁陽郡乾元初復為薊州遼置尚武軍宋
改廣州軍金屬東都路元仍為薊州隸大都路國
朝因之以漁陽縣省入改屬順天府右北平秦之郡
名即春秋時山戎肥子二國也漢末為公孫度所據
魏改盧龍郡北燕置平州及樂浪郡後魏改樂浪為
北平郡隋改為平州後廢州為郡唐復改平州天寶

初改為北平郡。乾元初，復為平州。五代唐以為遼興軍。金陞為南京。天會初，復為平州。陞興平軍。元改興平府。中統初，陞為平灤路。大德中，改為永平路。國朝初，改為永平府。屬北平布政司。後直隸京師。遼東古郡名。戰國時屬燕。秦屬營州。漢初，因之。武帝拓朝鮮地，并割遼東屬邑置樂浪、玄菟、真番、臨屯四郡。漢末為公孫度所據。三國魏置東夷校尉居襄平，而分遼東、昌黎等五郡置平州。晉改遼東郡為國，仍隸平州。尋為慕容廆所據。後魏仍為遼東郡。隋初又為高句麗所據。唐征高麗，復其地置蓋遼二州。又置都督府。九以安東都護總統之。尋為渤海大氏所據。五代時地入契丹。阿保機脩遼東故城以居，名曰東平郡。尋陞南京。又改為東京。金初因之。後置遼陽府。元為東京路。尋改為遼陽路。本朝初置定遼都衛，後改為遼東都指揮使司。隸山東道。

魏公子無忌卒

秦既敗於河外使人行萬金以間信陵君求得晉鄙客令說魏王曰公子亡在外十年矣今復為將諸侯皆屬天下徒聞信陵君不聞魏王矣秦王又數使人賀信陵君得為魏王未也魏王信之使人代將於是信陵君謝病不朝日夜以酒色自娛四歲而卒韓王往弔其子榮之以告子順子順曰禮鄰國君弔君為之主今君不命子則子無所受韓王矣其子辭之

戊秦四楚二十燕十二魏三十
午四趙二韓三十齊二十二年
春秦伐魏取囂有詭集

覽

囂有詭魏邑名秦皇本紀注
徐廣曰囂音場索隱曰音暢

○秋七月秦蝗疫令民

納粟拜爵

書法

始鬻爵也自是漢文帝書詔民入粟邊得拜爵武帝書詔民得買爵書令株送徒入財補

郎安帝書令吏民入錢穀拜官賜爵桓帝書賣關內侯以下官靈帝書開西邸賣官皆自秦始矣書

蝗始此終綱目書大蝗十六書蝗三十七詳漢文帝後元六年書疫始此終綱目書大疫十一書疫

四詳漢元帝初元元年

已秦五楚二十一燕十三魏景閔王秦伐魏取二十城未增元趙三韓三十一齊二十三年

置東郡集覽

東郡注見漢光武建武八年

庚秦六楚二十二燕十四魏二楚趙魏韓衛合從以伐申趙四韓三十二齊二十四年

秦至函谷皆敗走考異

據前後例魏當在趙韓上

諸侯患秦攻伐無已時故五國合從以伐之楚王為從長春申君用事取壽陵至函谷秦師出五國兵皆走敗集覽壽陵徐廣曰在常山郡本趙邑

書法

於是取壽陵至函谷秦師出五國之兵皆敗走不書秦師出何見五國之必自敗也五國

則曷為必敗合異以為同聯疎以為親以之擯秦未保也况伐秦乎以七十年前之五國不敵也况今日之五國乎然則田文何以獨得志田文初脫虎口志在復讐當是時以之入秦可也豈黃歇輩所能辨哉是以上書燕趙韓魏齊楚合從以擯秦則繼書秦以齊魏伐趙上書楚趙魏韓衛合從以伐秦則下書至函谷皆敗走明從約之不可恃也

發明

五國至是猶奄奄垂絕之人爾而乃合兵伐秦固已不待叩關逆知其敗必矣然則

聽秦之暴可乎無已則脩政用費於內合從締
交於外相與保境自守秦攻一國則諸侯救之
可也無名與師仰闕而伐自速敗亡咎將誰執
故綱目書此以自敗為文所以著諸國悖謬
之罪也

楚遷于壽春

朱英謂春申君曰先君時秦善楚二十年不攻者踰
邕阨而攻楚不便假道兩周背韓魏而攻楚不可今
則不然魏旦暮亡不能愛許鄢陵割以與秦秦兵去
陳百六十里臣見秦楚之日闕也楚於是去陳徙壽
春命曰郢春申君集覽邕阨通作鄢或作寔並音
就封於吳行相事盲阨通作隘春申君傳作邕
隘楚世家作鄢塞徐廣曰在江夏正義曰今申州羅
山縣本漢鄢縣有平靖闕蓋古鄢縣之阨塞杜預曰

徐云在江夏誤矣魏世家作冥阨孫檢曰楚之險塞也括地志云申州東南有石城山甚險峻魏攻冥阨蓋謂此山淮南子曰天下九塞冥阨其一焉按申州今信陽是也壽春楚考烈王自陳徙都壽春號曰郢索隱曰漢廬江郡壽春縣隋改壽州宋陞壽春府今安豐下蔡縣是質實一統志云冥陽府信陽州東南九十里即春秋所謂平靖關也有大小石門鑿山通道淮南子曰天下九塞冥阨其一也許周之國名春秋屬晉戰國屬魏秦屬潁川郡漢置許縣東漢獻帝都於此曹魏改曰許昌北齊改為南鄭州後周復為許州隋改為潁川郡唐復為許州宋陞為潁昌府元復為許州國朝因之改屬開封府鄆陵春秋鄭邑名戰國屬魏謂之安陵漢置鄆陵縣屬潁川郡東魏屬許昌郡北齊省之隋復置屬許州唐宋金元俱仍舊國朝因之改屬開封府壽春古邑名春秋時為六蓼國地楚考烈王自陳遷都於此

號曰郢都秦置壽春邑尋為九江郡漢為淮南國東漢為揚州刺史治所晉置淮南郡東晉改壽陽郡元魏置揚州梁改豫州隋初置壽州唐改為壽春郡五代唐為順化軍南唐改清淮軍宋置壽春府元置安豐路國朝改為壽州屬鳳陽府

秦拔魏朝歌及衛濮陽衛徙居野王集覽

朝歌汲郡朝歌故城在衛

縣紂所都也即今衛州

質實

一統志云朝歌古地名本殷紂所都周武王克殷分其北為邶南為鄘東

為衛後封康叔於衛春秋時邶鄘入之戰國屬魏秦屬河東郡漢為汲縣地屬河內郡曹魏置朝歌郡屬冀州晉改汲郡後魏改義州後周改衛州隋改汲郡唐復為義州尋復改衛州屬河北道宋因之金改河平軍元改衛輝路國朝改為衛輝府屬河南道

辛秦七楚二十三燕十五魏三
西趙五韓三十三齊二十五年
秦伐魏取汲

壬秦八楚二十四燕十六魏四
戊趙六韓三十四齊二十六年
魏與趙鄴

癸秦九楚二十五燕十七魏五
亥趙七韓王安元齊二十七年
秦伐魏取垣蒲集覽垣蒲

索隱曰垣即魏之長垣縣屬河南蒲是長垣之蒲鄉今
蒲城是括地志云故蒲城在滑州匡城北十五里按匡

城古長垣魏世家作垣蒲陽注故垣地本魏王垣也在
絳州垣縣西北二十里蒲邑故城在隰州隰川南四十

五質實一統志云垣古邑名即周召分陝之處春秋時
屬晉戰國時屬魏秦漢為垣縣地屬河東郡後

魏置邵郡及白水縣後周兼置邵州改縣曰毫城隋改
為垣縣屬絳郡義寧初置邵原郡唐改邵州貞觀初州

罷以縣屬絳州宋改曰垣曲縣金仍舊元初省入絳縣
尋復置國朝因之改屬平陽府蒲古邑名即春秋時

晉之蒲城也戰國時屬魏後屬秦漢為河東郡蒲子縣地後魏置石城縣後周置石城郡周末廢又置蒲子縣隋以蒲子移治縣東北故箕城大業初改為蒲縣屬龍泉郡唐移今治元省入隰川縣尋復置屬隰州國朝因之改屬平陽府

○夏四月秦大寒民有凍死者

書法

四月大寒異也至有凍死者甚異矣故備書之終綱目書大寒二是年梁乙未年四月大

寒一而已秦未建亥必因周歷此書四月為夏亦周不改月之一驗也

○秦王冠帶劍

書法

書冠始此自是終綱目書帝冠十三詳漢惠帝四年

○秦伐魏取行氏集覽

行氏地志闕又注見周慎靚王四年

○秋九月秦

嫪毐作亂伏誅夷三族秦王遷其太后於雍

初秦王即位年少太后時時與文信侯私通王益壯文信侯恐事覺及禍乃以舍人嫪毐詐為宦者進之生二子封毐為長信侯政事皆決於毐至是有告毐實非宦者王下吏治毐毐懼矯王御璽發兵為亂王使相國昌平君昌文君攻之毐戰敗走獲之夷三族遷太后於雍蒗陽宮殺其二子下令敢諫者死諫而死者二十七人斷其四支積之闕下齊客茅焦請諫王大怒按劍而坐口正沫出趣召鑊欲烹之焦徐行至前再拜謁起稱曰臣聞有生者不諱死有國者不諱亡諱死者不可以得生諱亡者不可以得存死生存亡聖主所欲急聞也陛下欲聞之乎王曰何謂也焦曰陛下有狂悖之行不自知邪車裂假父囊撲二弟遷母於雍殘戮諫士桀紂之行不至於是矣今天下聞之盡瓦解無嚮秦者臣竊為陛下危之臣言已

矣乃解衣伏質王下殿手接之爵以上卿
集覽 嫪姓毒

自駕虛左方迎太后歸復為母子如初
劉伯莊曰嫪居虬反毒徒酷反如淳曰嫪郎報反毒

烏改反按如說是昌平君昌文君索隱曰昌平君楚
公子也立以為相後徙於郢項燕立以為荆王史失

其名昌文君名亦不知也
名也應劭曰宮在扶風郿縣秦文王所建假父指嫪
毒囊撲撲弼角反以縲囊盛其人投擲而擊殺之

質實 一統志云
十秦惠文王建漢時猶存宣帝嘗幸之

書法 於是周亡始書太后從其恒稱矣據周存君
王后稱母遷辭有二太后遷居其宮者順辭

也遷太后于其宮者逆辭也終綱目書遷太后六
是年秦王漢安帝延光四年孫程遷閭太后靈帝

建寧元年曹節遷竇太后後主延熹十年曹爽遷
郭太后壬午年梁王衍遷齊太后唐中宗神龍元

年遷武太后書遷其皇后二漢哀帝元壽二年遷
皇后傳氏靈帝中平六年遷皇后董氏皆逆辭也
非逆辭則罪辭也書太后遷居
某宮五詳漢昭帝元平元年

發明

上書嫪毐作亂伏誅繼書遷其太后於雍則
太后之遷為有名而非芊氏無罪之比矣茅
焦進諫復為母子綱目削去而不書者所
以著其得罪宗祧之意云爾嗚呼嚴哉

楚王完薨盜殺黃歇

楚考烈王無子春申君求婦人宜子者進之甚衆卒
無子趙人李園進其妹於春申君既有娠園使妹說
春申君曰楚王無子即百歲後將更立兄弟彼亦各
貴其故所親君又安得常保此寵乎且君貴用事久
多失禮於王之兄弟兄弟立禍且及身矣今妾有娠
而人莫知誠以君之重進妾於王賴天而有男則是

君之子為王也楚國可盡得孰與身臨不測之禍哉
春申君乃出之謹舍而言諸王王召幸之遂生男立
為太子園妹為后園亦貴用事恐春申君泄其語陰
養死士欲殺春申君以滅口國人頗有知之者王病
朱英謂春申君曰李園君之仇也不為兵而養死士
之日久矣王薨必先入據權殺君以滅口君若置臣
郎中王薨園入臣為君殺之春申君曰園弱人也僕
又善之且何至此英知言不用懼而亡去後十七日
王薨園果先入伏死士於棘門之內刺
殺春申君滅其家太子立是為幽王
幸之蔡
衣服之加於身飲食之入於口妃妾之接於寢皆曰
御御之親愛者曰幸不為兵為如字楚國策作不為
兵將棘門正義
曰壽春城棘門

書法

不稱楚相何削之也據俠累稱韓相歇欺君
以自禍則不足以相人國矣綱目書盜殺十

一而削其官者三黃
歇王君奭李輔國

甲秦十楚幽王悍元燕十八魏
子六趙八韓二齊二十八冬十月秦相國呂不韋

以罪免出就國考異
提要書曰秦呂不韋以罪免相就國

秦王以不韋奉先王
功大不忍誅免就國

書法

免例有三書某人免者可免者也著所坐者
有罪者也書免某人官下某人獄免徵下獄

免皆無罪者也書以罪免則異於范睢矣故徙蜀
則削其爵終綱目書以罪免八不韋石顯匡衡趙

欽胡廣殷浩邵陵王綸再書著
所坐書免三司空融祭彤謝萬

秦大索逐客客卿李斯上書召復故官遂除其令

秦宗室大臣議曰諸侯人來仕者皆為其主遊閒耳請一切逐之於是大索逐客客卿楚人李斯亦在逐中行且上書曰昔穆公取由余於戎得百里奚於宛迎蹇叔於宋求丕豹公孫支於晉并國二十遂霸西戎孝公用商鞅諸侯親服至今治彊惠王用張儀散六國從使之事秦昭王得范雎彊公室杜私門由此觀之客何負於秦哉今乃不問可否不論曲直非秦者去為客者逐棄黔首以資敵國卻賓客以業諸侯此所謂藉寇兵而齎盜糧者也臣聞泰山不讓土壤故能成其大江河不擇細流故能就其深王者不却衆庶故能明其德此五帝三王之所以無敵也惟大王圖之王乃召李斯復其官除逐客之令卒用斯謀陰遣辯士齎金玉遊說諸侯厚遺結其名士不可下者刺之離其君臣之計然後使良將將兵隨其後數年之中卒

集覽

由余秦繆公求士西取由余於戎李斯傳注其先春秋晉人也亡入戎耳

百里奚注見周顯王三十一年五殺大夫蹇叔索隱曰秦本紀云百里奚謂穆公曰臣友蹇叔賢而世莫知繆公遂厚幣迎之今云迎於宋未詳所出正義曰蹇叔岐州人時遊於宋丕豹索隱曰丕豹自晉奔秦左傳有明文公孫支索隱曰卽子桑也是秦大夫而云求於晉未詳所出正義曰公孫支岐州人時遊於晉黔首黔其炎反應劭曰黧也始皇名民曰黔首以其頭黑也藉寇兵而齋盜糧索隱曰藉或作借謂以兵假寇也齋子奚反持遺也言為盜齋糧也齋或讀為資

書法

書召復故官何譏也秦并天下李斯力也何譏并天下者李斯也促秦亡者亦李斯也終

綱目書上書四惟李斯見聽亦惟李斯為譏書大索始此終綱目書大索二是年二十九年大搜一漢武帝征和元年書上書始此終綱目書上書四李斯梅福鮑宣賀琛書上疏一後唐康澄書獻策一王

通實融曹操單于
南詔上書不與焉

齊趙入秦置酒

書法

於是通鑑不書綱目特書之何譏媚敵也國
幾亡矣所以自免者如是而已書置酒始此

終綱目書置酒四
是年漢高帝五年
七年唐貞觀七年
宴享不與焉

乙秦十一楚二燕十九魏七
丑趙九韓三齊二十九年
趙伐燕取狸陽秦伐趙取

九城考異

提要無趙伐燕
取狸陽六字
集覽
狸陽正義曰燕無狸陽
疑狸字誤當是漁陽

書法

兩國事也其不殊之何病趙也西支不暇而
暇北侵其得喪竟何如哉合而書之所以為

謀人者
之戒也

○趙王偃薨

子遷立其母偁也嬖於悼襄王王廢嫡子嘉而立之遷素以無行聞於國

丙秦十二楚三燕二十魏八趙
寅幽繆王遷元韓四齊三十年
秦呂不韋徙蜀自殺

不韋就國歲餘諸侯者請之相望於道王恐其為變賜不韋書曰君何功於秦封河南十萬戶何親於秦號稱仲父其徙處蜀不韋恐誅飲酖死

書法

徙辭有四徙某某廢某徙貶某徙無罪之辭也某徙者有罪之辭也

自六月不雨至于八月

書法

恒陽也書不雨始此終綱目書自某月不雨至于某月六是一年漢獻帝興平元年後主建

興九年宋文帝庚午年齊主蹟
辛未年唐德宗貞元十九年

○秦助魏伐楚

丁秦十三楚四燕二十一魏
卯九趙二韓五齊三十一年
秦伐趙殺其將扈輒趙以

李牧為大將軍復戰宜安秦師敗績

戊秦十四楚五燕二十二魏
辰十趙三韓六齊三十二年
秦伐趙取宜安平陽武城

集覽

宜安括地志云故城在常山郡藁城縣西南平陽
故城在相州臨漳縣西武城縣名屬貝州即東武

城
質實

一統志云宜安古邑名春秋時屬晉戰國時屬
趙秦置宜安縣屬常山郡晉宋廢之其地屬鉅

鹿郡隋復置唐省入藁城縣故城在縣西南仍屬真定
府平陽古邑名春秋時屬衛後屬晉戰國時屬趙秦滅

趙改屬東郡漢初仍舊三國魏省之故城在大名府滑縣東南五十里廢韋城縣西二十里左傳衛侯飲孔悝酒於平陽即此武城春秋晉邑名戰國趙為平原君封邑地漢置東武城縣屬清河郡晉去東字隋改為清河縣以舊東武城為武城縣唐移治永濟渠西屬貝州宋屬恩州移今治金仍其舊元屬高唐州國朝因之改屬東昌府

○韓遣使稱藩於秦

初韓諸公子非善刑名法術之學見韓削弱數以書干韓王王不能用非疾治國不務求人任賢反舉浮淫之蠹加之功實之上寬則寵名譽之人急則用介冑之士所養非所用所用非所養作孤憤五蠹說難等篇十餘萬言至是王使納地效璽於秦請為藩臣非因說秦王曰大王誠聽臣說一舉而天下之從不破趙不舉韓不亡荆魏不臣齊燕不親則斬臣狗國以戒為王謀不忠者王悅之未用李斯譖之下吏自

殺楊子曰韓非作說難而卒死乎說難何也曰說難蓋其所以死也君子以禮動而義止合則進否則退確乎不憂其不合也夫說人而憂其不合則亦無所不至矣司馬公曰君子親其親以及人之親愛其國以及人之國非為秦謀而首欲覆其

集覽

非疾治國宗國罪固不容於死矣烏足愍哉韓非以治

國者之所為為疾也其所疾者即下文不務求人任賢以下數事所養非所用時君以祿養之臣皆非折衝禦侮之士所用非所養其臨事任用者並非常所祿養之人故難以盡其死力孤憤言孤直不容於時五蠹言蠹政之事有五說難說音稅言遊說之道不易也效顰效呈獻也楊子曰揚雄所撰書問明篇云卒死乎說難韓遣非使秦秦王欲用非李斯毀之下吏治非斯遺非藥使自殺蓋其所以死謂說難欲探人心而求合則無所不至此適足以取死

已秦十五楚六燕二十三魏十
已一趙四韓七齊三十三年
秦伐趙取狼孟番吾遇

李牧而還集覽

狼孟縣名屬太原故城在陽曲縣是也

質實

一統志云狼孟戰國趙之

邑名秦置狼孟縣屬太原郡漢置曲陽縣在今定襄縣境漢末移治太原縣北境魏又徙于狼孟縣南境後魏以陽曲縣屬永安郡隋改曰陽直屬并州又徙治汾陽故城改曰汾陽煬帝復曰陽直唐於故陽曲城置汾陽縣尋省陽直改汾陽曰陽曲宋屬太原府金始移置郭下元仍其舊國朝因之改屬太原府

書法

伐國未有書遇而還者書遇李牧而還予牧功也

○燕太子丹自秦亡歸考異

提要無此八字

初丹嘗質於趙與秦王善及秦王即位丹質於秦秦王不禮焉丹怒亡歸

庚秦十六楚七燕二十四魏十
午二趙五韓八齊三十四年
秋九月韓獻南陽地于

秦○代地震圻

東西百
三十步

書法

地震變也震而圻大變也不三年而趙亡變
不虛生信矣凡地震書地一方震也不地非

一方也天下地震無一方不震也書地震始此終
綱目書地震一百一秦庚午年漢惠帝二年呂后

乙卯年文帝元年五年景帝中元年中三年中五
年後元元年武帝元光四年征和二年後元元年

宣帝本始元年四年地節三年元帝初元二年再
書永光三年建昭二年四年成帝建始三年河平

三年綏和二年孺子嬰初始元年莽丙子年光武
建武二十二年章帝建初元年和帝永元四年五

年七年九年安帝永初元年二年三年四年再書
五年七年元初元年二年三年再書四年五年六
年再書永寧元年建光元年延光元年再書二年
三年四年順帝永建三年陽嘉二年四年永和二
年再書三年再書四年五年漢安二年建康元年桓
帝建和元年再書三年書再震元嘉元年二年再書
永興二年永壽二年延熹四年五年八年永康元年
靈帝建寧四年熹平二年六年光和元年再書二年
三年獻帝初平二年四年再書興平元年書再震
建安十四年後主十二年十五年晉武帝太康九
年安帝隆安四年恭帝元熙元年宋己巳年梁癸
巳年隋文帝開皇二十年天下地震唐太宗貞觀
二十三年玄宗開元二十二年僖宗乾符三年五
代癸巳年書地坼三是年漢安帝元初元年順帝
陽嘉二年書地裂三漢和帝永元七年桓帝永康
元年唐僖宗乾符三年坼又甚於裂也西涼效穀

西平各地裂不書不與焉晉恭帝元熙元年書地動一漢景帝後二年書地陷一漢安帝元初元年

辛秦十七楚八燕二十五魏十三趙六韓未九齊三十五年○是歲韓亡凡六國秦內史勝滅

韓虜王安置潁川郡集覽

潁川郡注見漢靈帝中平元年

書法

五國皆先書擊伐後書滅此其直書滅何韓為秦藩久矣直書滅易辭也亡國之君其辭

五死之上也執虜次之以歸次之獲次之降為下

○趙大饑

壬秦十八楚九燕二十六魏申十四趙七齊三十六年

秦王翦伐趙下井陘趙殺

其大將軍李牧集覽

井陘地志常山郡石邑西有井陘山括地志云井陘故關在并州石

父縣陘東十八里即井陘口也

質實

一統志云井陘戰國趙邑名後屬秦

漢置井陘縣屬常山郡晉宋因之隋於縣置井陘郡唐初改并州尋省宋於縣置天威軍金改為威州元移威州治洺水以井陘隸廣平路本朝因之改屬真定府

秦王翦伐趙趙使李牧禦之秦多與趙嬖臣郭開金使言牧欲反趙王使趙葱顏聚代之牧不受命遂殺之

書法

於是六年三書李牧牧死而趙隨之亡矣

發明

書國以殺而不去其官者明牧之無罪不失其官守也趙國危若累卵僅有一將若可少

延晷刻之命而乃無故殺之果何為哉前書牧戰敗秦及秦遇牧而還所以著牧存趙之績後書秦

滅趙虜王遷所以著趙見滅之因
趙之為國用人如此欲無亡得乎

癸秦十九楚十燕二十七魏十五趙八
西齊三十七年○是歲趙亡凡五國

秦滅趙虜王遷

秦王如邯鄲

故與母家有
仇者皆殺之

秦軍屯中山以臨燕考異

提要書曰秦滅趙虜王
遷秦王如邯鄲遂臨燕

○趙

公子嘉自立為代王與燕合兵軍上谷○楚王薨弟郝

立三月郝庶兄負芻殺之自立考異

此據凡例亦當書
楚王悍薨蓋刊本

漏悍

考證

殺當作弑○謹按春申君進李園妹為楚考
烈王后生太子悍立為幽王幽王本春申子

也鬻熊之祀陰絕十年而幽王死同母弟立是為哀
王哀王史記六國表名郝世家名猶通鑑本六國表故
曰弟郝立此真考烈子在位三月庶兄負芻弑而代之
或曰郝弟也負芻兄也孰可以弑加之乎曰不然凡例
曰列國弑君事義不同者隨事異文註曰如元魏馮后
顯祖之事雖其主母亦不得免弑君之名負芻親則庶
兄分則臣下馮后殺子負芻殺弟一例也惡得不謂之
弑哉嗚呼負芻殺弟遂負弑君之罪苟能殺幽王明其
非考烈子誅李園立考烈真子尚足以繼鬻熊之絕世
雪先王之餘恥家齊而國治其功烈豈不躋歟惜其志
不及此有勇無義而為亂哀哉正君臣之義明適庶之
分故曰殺當作弑非特罪負芻也將以懲勸方來云爾

書法

綱目之法君沒叔姪兄弟爭國非下犯上書
殺而已矣綱目叔姪兄弟爭國六是年晉懷

帝永嘉四年劉聰弑太子和穆帝永和五年石遵
弑太子世安帝隆安三年呂纂殺太子紹宋庚午

年馮弘殺太子翼庚戌年楚希萼殺希廣
惟劉聰以弟書弒石遵以及其太后書弒

甲秦二十楚王負芻元燕二十八魏王假元齊三
戌十八年○代王嘉元年○舊國五新國一凡六燕太

子丹使盜劫秦王不克秦遂擊破燕代兵進圍薊考異

提要書曰秦
遂進兵圍薊

初丹既亡歸怨秦王欲報之以問其傳鞠武武請約
三晉連齊楚媾匈奴以圖之太子曰太傅之計曠日
彌久令人心惛然恐不能須也頃之秦將軍樊於期
得罪亡之燕太子受而舍之鞠武諫不聽太子聞衛
人荊軻賢卑辭厚禮而請見之謂曰秦已虜韓臨趙
禍且至燕燕小不足以當秦諸侯又皆服秦莫敢合
從丹以為誠得天下之勇士使於秦劫秦王使悉反
諸侯侵地若曹沫之與齊桓公盟則善矣不可則因

而刺殺之彼大將擅兵於外而內有亂則君臣相疑
以其間諸侯得合從破秦必矣惟荆卿留意焉軻許
之乃舍軻上舍丹日造門所以奉養軻無不至會秦
滅趙丹懼欲遣軻軻曰行而無信則秦未可親也願
得樊將軍首及燕督亢地圖以獻秦王秦王必悅見
臣臣乃有以報丹曰樊將軍窮困來歸丹丹不忍也
軻乃私見於期曰秦王遇將軍可謂深矣父母宗族
皆為戮沒今聞購將軍首金千斤邑萬家將奈何於
期太息流涕曰計將安出軻曰願得將軍之首以獻
秦王秦王必喜而見臣臣左手把其袖左手揜其胷
則將軍之仇報而燕見陵之愧除矣於期曰此臣之
日夜切齒腐心者也遂自刎丹持往伏哭然已無可
奈何乃函盛其首又嘗豫求天下之利匕首以藥淬
之以試人血濡縷無不立死者乃裝遣軻至咸陽見
秦王奉圖以進圖窮而匕首見把王袖而揜之未至
身王驚起軻逐王環柱而走秦法羣臣侍殿上者不

得操尺寸之兵左右以手共搏之且曰王負劍王遂拔以擊軻斷其左股軻引匕首擣王不中自知事不就罵曰事所以不成者欲生劫之必得約契以報太子也遂體解以徇王大怒益發兵就王翦於中山與燕代戰易水西

集覽

曹沫與齊桓公盟索隱曰沫莫大破之遂圍薊葛反左傳作曹劌然則沫宜音

昧劌沫字異而聲近曹沫事魯莊公為將與齊戰三敗莊公懼獻遂邑以和乃會柯而盟將盟曹沫執匕首劫桓公曰反魯之侵地桓公許之沫乃投匕首下壇北面就羣臣之位後桓公欲倍約管仲不可乃以侵地盡復予魯按此事約公羊傳為說然彼無其名直云曹子而已且左傳莊十年戰于長勺用曹劌謀敗齊而無劫齊桓說十三年盟于柯公羊傳始稱曹子穀梁傳惟云曹劌之盟也信齊侯也又不記其行事之時日以其間以因也因其君臣自相離間督亢地圖劉向別錄曰督亢燕之膏腴地今涿州南新城

縣古督亢亭也括地志云范陽東南十里固安縣南有督亢陂坐之南界也燕欲以獻秦故畫圖獻之亢

音抗或音剛堪其胸堪知鵠反礙擊也血濡縷以匕首試人血出如絲縷之細易水源出易州南安閭山

東經霸州文安入滹按易州漢固安縣也正誤以其間今按質實一統志云督亢

陂名在順天府涿州東南其地沃美秦求之燕燕太子丹使荆軻賫督亢地圖以進即此今為督亢亭在

焉易水在保定府安州城之北源自府境曹河徐河石橋河一畝泉河滋河沙河鴉兒河唐河諸水至此

合流為易水又至雄縣南為瓦濟河過直沽入于海史記燕太子丹使荆軻刺秦王送至易水即此

發明秦滅六國皆無罪獨燕有盜劫之舉丹不惟不能制秦而反以速禍為計亦左矣然綱目

不書秦討其罪者秦為無道人皆可得殺之故止書盜劫之事而不正燕丹之罪爾若夫荆軻自以

為賢而不免以盜書者蓋與聶政同科不然是又司馬遷之史矣何以為綱目哉

乙秦二十一楚二燕二十九
亥魏二齊三十九代二年
冬十月秦拔薊燕王走遼

東斬其太子丹以獻於秦

書法

書斬何罪丹也故不書殺
不書誅何不劫秦亦亡矣

○秦李信伐楚

秦王問於李信曰吾欲取荆虔用幾何人對曰不過二十萬問王翦翦曰非六十萬人不可王曰將軍老矣何怯也乃使信及蒙恬將二
集覽 歸頻陽地志左
十萬人伐楚翦謝病歸頻陽
馬翊有頻陽縣

括地志云故城在宜州土門縣南今并入
輝州同官縣王翦是頻陽東鄉人故曰歸
質實 一統志云

李信隴西成紀人頻陽秦之縣名屬馮翊郡漢因之東漢改為祿祔縣晉初仍舊後省之故城在西安府

富平縣東北七十里

丙秦二十二楚三燕三十魏三齊四子十代三年○是年魏亡凡五國

秦王賁伐魏引河

溝以灌其城魏王假降殺之遂滅魏考異

提要書曰秦王賁滅魏王

假降殺之

集覽

王賁翦之子也賁音奔

書法

伐未有書方畧者書引灌何始開河隙也據漢平帝元始四年王橫言自後決處遂大不

可復補後六十年始書河決矣戰伐惟秦書引河溝惟朱梁書決河戊寅年皆重其始開河隙也

○楚人大敗秦軍李信犇還秦王翦代之考異

提要秦下有使

李信大敗楚軍引兵西與蒙恬會城父楚人因隨之
三日不頓舍大敗之入兩壁殺七都尉信犇還王怒
自至頻陽謝王翦彊起之翦曰老臣罷病悖亂大王
必不得已用臣非六十萬人不可王許之於是翦將
六十萬人伐楚王自送至霸上翦請美田宅甚衆王
曰將軍行矣何憂貧翦曰為大王將有功終不得封
侯故及大王之鄉臣請田宅為子孫業耳王大笑既
行又數使使者歸請之或曰將軍之乞貸亦已甚矣
翦曰王怵中而不信人今空國而委

集覽

城父索隱曰在汝南

我不可有以自堅顧令王坐而疑我矣
即應鄉正義曰言引兵西會城父則汝州郟城縣東
父城是也杜預曰襄城城父縣是霸上霸水之上地
名在長安東三十里三秦記云霸水古滋水也出雍
州藍田谷北入渭正義曰即秦嶺水之下流秦繆公

築宮於此更名城曰霸城水曰霸水以章霸功鄉臣
鄉與嚮通護也王怛中而不信人王翦傳注徐廣曰
怛一作粗通鑑釋文曰怛通作粗心不精也戰國趙
策智伯麤中而少親注麤與粗同疏也然模韻內無
此怛字惟御韻內怛
音將預反訓驕也
正誤
大王鄉臣今按
鄉謂意所嚮也
質實
一統
志云
城父春秋陳之邑名戰國屬楚後屬秦漢置城父縣
屬沛郡晉屬譙郡隋屬亳州元廢為村有文廟碑存
焉故城在鳳陽府亳縣東南七十里霸水在西安府
城東二十里本名滋水秦繆公更名以章霸功源出
秦嶺合藍谷傾谷諸
水入滄水北注于渭

丁秦二十三楚四燕三十
丑一齊四十一代四年
秦王翦大破楚軍殺其將項

燕

王翦取陳以南至平輿楚人悉國中兵以禦之翦堅壁不戰日休士洗沐而善飲食撫循之親與士卒同食久之問軍中戲乎對曰方投石超距翦曰可矣楚既不得戰引而東翦追擊大破之至蘄南殺其將軍

項燕楚師遂敗走翦乘勝畧定城邑

集覽

平輿縣名古沈子國輿一作與正義曰與音余平輿在豫

州東北五十四里投石超距徐廣曰超一作拔拔音蒲撥反案漢書甘延壽投石拔距絕於等倫注張晏曰范蠡兵法飛石重十二斤為機法行三百步延壽有力能以手投之拔距即超距也索隱曰超距猶跳

躍也顏師古曰甘延壽嘗超踰亭樓言其趨捷耳

質實

一統志云平輿春秋沈子國之地名戰國

時屬楚後屬秦漢置平輿縣以汝南郡治此後廢隋復置王世充置輿州唐州廢元省入汝陽縣故城在

汝寧府城東汝水之南

戊秦二十四楚五燕三十二齊四十
寅二代五年○是歲楚亡凡四國 秦滅楚虜王負芻

置楚郡質實

一統志云楚郡秦初所置治壽春邑漢初為九江郡東漢為揚州治所晉置淮南郡

東晉改壽陽郡隋改為壽州唐改為壽春郡五代唐為順化軍宋置壽春府後改安豐軍元置安豐路至本朝改為壽州以壽春縣省入仍屬鳳陽府

已秦二十五年燕十三齊四十三
卯代六年○是歲燕代亡凡二國 秦王賁滅燕虜王喜

還滅代虜王嘉○秦王翦遂定江南降百越置會稽郡

質實

一統志云會稽郡秦初所置治吳縣漢初因之後以吳縣置吳郡而徙會稽郡治山陰晉為會稽國

劉宋置東揚州領之隋初郡廢改東揚為吳州治會稽縣後改越州尋為會稽郡唐初復置越州後改為鎮東

軍五代錢氏陞為東都宋仍為越州元改為
紹興路至本朝改為紹興府直隸浙江道 ○五月天

下大酺考異

提要無此六字

書法

不書秦何秦已滅五國矣故書天下終綱目書酺六詳周赧王二十年

庚辰秦始皇帝二十六年王賁襲齊王建降遂滅齊考異

提要書曰王賁滅齊王建降

初齊君王后事秦謹與諸侯信齊亦東邊海上秦日夜攻五國五國各自救以故王建立四十餘年不受兵君王后且死戒建曰羣臣之可用者某王取筆牘受言后曰已忘之矣君王后死后勝相齊與賓客多受秦間金勸王朝秦不修戰備不助五國攻秦秦以故得滅五國齊王將入秦雍門司馬前曰所為立王

者為社稷邪王曰為社稷司馬曰為社稷而立王則王何以去社稷而入秦王乃還即墨大夫聞之見王曰齊地方數千里帶甲數百萬今三晉大夫不便秦而在阿鄆之間者百數王收而與之數萬之衆使收晉故地即臨晉之關可入矣鄆郢大夫不欲為秦而在城南下者百數王收而與之數萬之衆使收楚故地即武關可入矣如此則齊威可立秦國可亡豈特保其國家而已哉王不聽至是王賁自燕南攻齊猝入臨淄民莫敢格者建遂降秦遷之共處之松栢之間餓而死齊人怨建聽姦人賓客不蚤與諸侯合從以亡其國歌之曰松栢邪栢邪住建共者客邪疾建用客之不詳也司馬公曰從衡之說雖反覆百端然合從者六國之利也彛使六國能以信義相結則秦雖彊暴烏得而亡之哉蓋以三晉而攻齊楚是自絕其根柢也以齊楚而攻三晉是自撤其藩蔽也烏有集撤其藩蔽以媚盜曰盜將愛我而不攻豈不悖哉集

覽

后勝齊相姓名后胡口反勝音升雍門司馬左傳哀十四年出雍門注齊城門也雍於用反司馬主

武事宮垣內兵衛所在四面皆有司馬臨晉之關顏師古曰在同州朝邑界正義曰即蒲津關在馮翊臨

晉縣因名焉按馮翊郡即今同州本臨晉城住建共者客邪地理志共屬河內郡正義曰共音恭客謂陳

馳也戰國策注陳馳齊人之入秦者自秦稱之曰客秦使馳誘齊王建約與五百里地建遂入秦秦遷之

共故齊人歌云然

正誤

住建共者客邪今按齊人疾王建聽信姦人賓客不與諸侯合從以亡其

國不專指陳馳也

質實

一統志云蒲津關在西安府朝邑縣東黃河岸關下有鐵牛渡唐時橫絕

連艦以渡黃河後常絕斷艦破開元中鑄鐵牛八以纜浮梁今牛西岸三東岸四其一沉於河共古共伯

之國名周為鄘國地春秋時并於衛戰國時屬魏後屬秦漢置共縣屬河內郡晉屬汲郡隋改為共城縣

唐初以縣置共州并析置凡城縣尋廢州及省凡城入焉宋屬衛州金改河平縣又改蘇門縣後陞為輝州元因之本朝仍為縣改屬衛輝府

書法

四國皆書擊伐此其書襲何齊不備也后勝之罪大矣

王初并天下更號皇帝

王初并天下自以為德兼三皇功過五帝乃更號曰皇帝命為制令為詔自稱曰朕追尊莊襄王為太上皇胡氏曰古之聖人應時稱號非帝貶於皇王貶於帝也後世不知此義遂以皇帝自居而以王封其臣子失之甚矣王之為名繼天撫世之謂曾是而可使臣子稱之乎孔子作春秋尊周立號繫王於天其禮隆矣有天下者以是為法而列爵自公以降則名正言順百世以俟而不惑矣

除諡法

制曰死而以行為諡則是子議父臣議君也甚無謂
自今以後除諡法朕為始皇帝後世以計數二世三
世至于萬世傳之無窮胡氏曰子議父臣議君而非
其禮罪不容誅矣考德行之實而天以誅之臣子亦
安得而私之哉然後世諡法雖存而公道不暢為臣
子者往往加美諡於君親使死受所不當得取世訕
笑則又不若不**集覽**諡法史記諡法解惟周公太公
謚之為愈矣開嗣王業建功于牧野終將葬
乃制諡遂叙諡法天以誅之記曾子問篇賤不誅貴
幼不誅長禮也惟天子稱天以誅之注誅累也累列
生時行迹讀之以作諡諡當由尊者成天子稱天以
其無尊焉在天子上者惟天耳春秋公羊說以為讀
誅制諡於南郊若
云受之於天然也

發明

孟子曰三代之得天下也以仁其失天下也以不仁又曰行一不義殺一不辜而得天下

皆不為也秦王初并天下自以為德兼三皇功過五帝乃更號皇帝除謚法令後世以計數欲以一而傳萬其為計可謂深且遠矣抑不知秦之所以得天下者仁歟否歟奪人土地毀人宗廟滅人家國皆所不論姑以斬首計之自石門之戰至于報亡之歲其見於史冊可得而考者蓋百四十餘萬矣又自報亡之後迄于兼并之日垂四十年史傳皆不載首虜之數其間攻拔城邑屠滅國都兵禍殆無虛日豈無一人死於鋒鏑之下斬刈殺戮疾驅力戰秦之得天下者如此乃欲偃然自以為子孫帝王萬世之業是豈果無天道耶要之國祚脩短每視其得國之實向使秦氏并吞之後改絃易轍脩仁行義猶不能保其有國況以殘暴趣之乎不二世而遽滅信有由矣語曰君以此始亦以此

終參諸孟氏之言而益信

定為水德以十月為歲首

初齊人鄒衍論著終始五德之運始皇采用其說以為周得火德秦代周從所不勝為水德始改年朝賀皆自十月朔衣服旌旒節旗皆尚黑數以六為紀以為水德之始剛毅戾深事皆決於法刻削毋仁恩和義然後合於五德之數

集覽

旌旒節旗皆尚黑禮春於是急於法久不赦官司常注旌旗之上綴

旌牛尾於竿首詳見九旗圖地官掌節注節猶信也行者所執之信詳見八節圖秦以水德屬北方故尚黑數以六水終數六故以六寸為符六尺為步刻削水主陰陰主刑殺故急法刻削

書法

書水德何著始也五德之論古不經見鄒衍始倡此論秦人采之以急於法而天下受其

毒自是代興所王各異綱目不悉書再書水德而已矣齊壬申年魏水德綱目書以其月為歲首始此終綱目書改正者五是年漢武帝太初元年建寅後主建興十五年魏建丑唐中宗嗣聖六年武后用周正肅宗上元二年建子卒無以易夏時者矣

發明

孔子曰行夏之時以商之建丑周之建子且不可用況以十月為歲首乎秦不師古無足道者然不得不書之以著其失

分天下為三十六郡銷兵器一法度徙豪傑於咸陽

丞相綰等言燕齊荆地遠請立諸子為王以鎮之始皇下其議廷尉斯曰周封子弟同姓甚衆然後屬疏遠相攻擊如仇讐天子弗能禁今海內賴陛下神靈一統皆為郡縣諸子功臣以公稅賦重賞賜之甚足

易制天下無異意則安寧之術也置諸侯不便始皇
曰天下共苦戰鬪不休以有侯王賴宗廟天下初定
又復立國是樹兵也而求其寧息豈不難哉廷尉議
是分天下為三十六郡郡置守尉監收天下兵銷以
為鐘鐻金人置宮庭中一法度衡石丈尺徙天下豪
傑於咸陽十二萬戶胡氏曰聖人理天下以萬物各
得其所為極至封建也者帝王所以順天理承天心
公天下之大端大本也郡縣也者霸世暴主之所以
縱人慾悖天道私一身之大孽大賊也分天下有德
有功者以地而不敢以天下自私於是有百里七十
里五十里不能五十里邦國之制焉於是有君朝卿
大聘大夫小聘王巡狩侯述職之禮樂法度焉於是
有千雉百雉三之一五之一一高城深池焉於是有井
邑丘甸縣都之大數焉於是有十乘百乘千乘萬乘
之車數焉於是有伍兩卒旅師軍之制焉於是有鄉
大夫司徒樂正取士之法焉邦國之制廢而郡縣之

制作矣郡縣之制作而世襲之制亡矣世襲之制亡而數易之弊生矣數易之弊生而民無定志矣巡狩述職之禮廢則上下之情不通考文案而不究事實信文案而不信仁賢其弊有不可勝言者矣城池之制廢而禁禦暴客咸服四夷之法亡矣夫家之法廢而民數不可詳矣民數不可詳而車乘不可出矣車乘不可出而軍師不隱於農矣軍師不隱於農坐食者衆而公私困窮矣世儒不知王政之本反以亡秦為可法所謂明君良臣者亦未免以天下自私無意於裁成輔相使萬物各得其所所以厯千五百餘歲未有能復之者也聖人制四海之命法天而不私盡制而不曲防分天下之地以為萬國而舉英才共焉非後世擅天下者以大制小以強制弱之謀也誠盡制而已矣是以虞夏商周傳於長久皆千餘載論興廢則均有焉語絕滅則至暴秦郡縣天下然後極也自秦滅先王之制海內蕩然無有根本之固有今世

王天下而繼世無置錐之地者有今年貴為天子而明年欲為匹夫不可得者天子尚然況其下者乎物有其根則常而靜安而久常靜安久則理得其終物遂其性封建者政之有根者也故上下辨民志定教化行風俗美理之易治亂之難亡

集覽

丞相綰丞丞扶之易興亡之難滅郡縣反是相助也掌承

天子助理萬機綰姓王氏廷尉斯廷平也治獄貴平故號廷尉斯姓李氏守尉監守去聲郡守掌治其郡丞尉掌佐守典武職甲卒監御史掌監郡鐘鐻鐻與虞通音巨周禮梓人為筍虞厚唇弇口出目短耳大胸後大體短脰若是者謂之羸屬其聲大而宏則於鐘宜若是者以為鐘虞是故擊其所縣而由其虞鳴注樂器所縣橫曰筍植曰虞金人關中記始皇二十六年有大入十二見於臨洮身長五丈足履六尺皆夷狄服天誠若曰勿大為夷狄行將滅其國始皇不知反以為瑞乃銷兵器鑄為金人象之索隱曰各

重千石坐高二丈號曰翁仲漢世在長樂宮門董卓徙清門裏魏明欲將詣洛陽載到霸城重不可致後石季龍徙之鄴苻堅又徙入長安銷之百里七十里五十里不能五十里邦國之制記王制曰公侯田方百里伯七十里子男五十里不能五十里者不達於天子附於諸侯曰附庸君朝卿大聘大夫小聘王巡狩侯述職之禮樂法度記王制諸侯之於天子也比年一小聘三年一大聘五年一朝天子五年一巡狩公羊傳注諸侯即位比年使大夫小聘三年使上卿大聘四年又使大夫小聘五年一朝因助祭以述職疏云此孝經說文千雉百雉三之一五之一高城深池左傳隱元年大都不過參國之一中五之一一小九之一注方丈曰堵三堵曰雉一雉長三丈高一丈天子千雉侯伯三百雉大都三分國城之一不過百雉中都五分之一不過六十雉小都九分之一不過三十雉井邑丘甸縣都之夫數禮地官小司徒經土

地而井牧其田野九夫為井四井為邑四邑為丘四丘為甸四甸為縣四縣為都以任地事而令貢賦凡稅斂之事羣書考索曰周禮所謂夫家之數者一夫受田百畝家出一夫而已其合居者亦惟計其丁壯而用之與別居者無異十乘百乘千乘萬乘之車數禮地官小司徒注司馬法曰畝百為夫夫三為屋屋三為井井十為通通十為成革車一乘十成為終革車十乘十終為同革車百乘諸侯大國一封三百六十六里兵車千乘天子畿內方千里兵車萬乘伍兩卒旅師軍之制禮地官小司徒五人為伍五伍為兩四兩為卒五卒為旅五旅為師五師為軍以起軍旅以作田役鄉大夫司徒樂正取士之法禮鄉大夫受教法于司徒退而頒之于其鄉吏三年則大比考其德行道藝而興賢者能者記王制命鄉論秀士升之司徒曰選士司徒論選士之秀者升之學曰俊士樂正順先王詩書禮樂以造士

書法

書銷兵器何譏私也秦之亡斬木揭竿者為之自秦書銷兵器至隋而書除毀兵仗文帝

開皇九年書收天下兵器十五年書禁民間兵器而鐵義搭鈎矟刃之屬皆禁之煬帝大業五年秦

輟也

築宮咸陽北阪上

初諸廟及章臺上林皆在渭南及破諸侯寫放其宮室作之於咸陽北阪上南臨渭自雍門以東殿屋複道周閣相屬所得諸侯美人鐘鼓以充入之

集覽

章臺在渭水南三輔黃圖云在長安故城西上

林苑名在渭水南即秦之舊地方三百里寫放寫摹畫也放讀曰倣倣也咸陽北阪上徐廣曰在長安西北漢武時別名渭城雍門史記注徐廣曰在高陵縣正義曰在岐州雍縣東殿屋複道周閣相屬正義曰

廟記云咸陽北至九嵎甘泉南至鄠杜東至河西至汧渭之交東西八百里南北四百里離宮別館相望聯屬木衣文綉土被朱紫宮人不徙窮年忘歸猶不能偏及考異漢書曰複道則築起為道不與民庶相雜天子自行其上有私路處則作穴竇如城門百姓在彼中往來也周閭周馳架木為棚而行名曰閣道質實

一統志云章臺街名在西安府舊長安城內漢京兆尹張敞罷朝走馬即此上林苑名在西安

府城內本秦舊苑漢武帝開廣之周迴數百里

書法

書築宮重民力也書築宮始此終綱目宮殿書築作五十六是年二十七年信宮三十五

年朝宮阿房二世元年復作漢高帝五年長樂宮武帝元封二年宣防宮六年首山宮太初元年建章宮四年明光宮更始癸未年修宮明帝永平三年北宮靈帝中平三年修南宮獻帝建安元年修

洛陽宮二十五年魏主丕營宮室後主建興五年
魏大營宮室十年魏治許昌宮十二年魏作洛陽宮
又立崇華殿延熙十年吳太初宮丁亥年吳昭明
宮晉成帝咸和五年新宮六年趙鄴宮咸康二年
趙太武殿八年趙長安宮洛陽宮穆帝永和元年
趙長安宮洛陽宮孝武帝太元三年作新宮安帝
元興三年燕逍遙宮義熙二年魏靈南宮宋癸亥
年魏西宮癸卯年宋大修梁乙卯年東魏新宮乙
丑年東魏晉陽宮丙子年齊大治宮室己亥年周
洛陽宮隋文帝開皇十三年仁壽宮煬帝大業元
年東京宮室三年晉陽宮四年汾陽宮十二年毘
陵宮唐太宗貞觀四年修洛陽宮五年再書八年
大明宮十一年飛山宮二十一年翠微宮又玉華
宮高宗顯慶五年合璧宮龍朔三年蓬萊宮永淳
元年奉天宮中宗嗣聖二十一年周興泰宮玄宗
開元二年興慶宮十三年集賢殿憲宗元和十三

年麟德承輝殿宣宗大中元年雍和殿五代辛卯年閏寶皇宮癸卯年楚九龍宮臺觀樓閣館院行

宮不與焉

辛巳二十七年帝巡隴西北地至鷄頭山過回中集覽

隴西

注見秦王政三年北地注見漢哀帝建平元年鷄頭山索隱曰後漢王孟塞鷄頭道即此括地志云山在成都上祿東北二十里酈道元云蓋大隴山異名也按原州高縣西百里亦有笄頭山在京兆西北八百里黃帝問道於廣成子之所輿地志云笄頭或即鷄頭也回中應劭曰在安定郡高平縣孟康曰在北地郡按安定北地今寧州涇州是括地志云秦回質實一統志云鷄頭山中宮在岐州雍縣西四十里在平涼府城西北十二里崆峒山之西以形似名史記黃帝西至于崆峒登鷄頭山即此回中宮名在鳳翔府隴州西北一百四

十里秦所建也漢文帝時勾奴入蕭關燒回中宮謂此

書法

凡巡遊譏也書巡始此終綱目書巡二十九始皇帝五馬漢武帝居七馬皆奢慾之主也

○作信宮及甘泉前殿治馳道於天下集覽

信宮作於渭南已而

以宮象天極又更名極廟按天官書中宮曰天極是也馳道天子所行道也若今之中道然漢書賈山傳曰秦為馳道於天下東窮燕齊南極吳楚江湖之上濱海之觀畢至道廣五十步三丈而樹厚築其外隱以金椎樹以青松漢令諸侯有制得行馳道者行質實一統志云旁道無得行中央三丈也隱去聲築也信宮即長信宮也在西安府咸陽縣境渭水南史記秦始皇初居長信宮即此

書法

書治馳道譏勞民也於天下甚矣書治道始此終綱目書治道二是年三十五年皆秦也

書開運道一唐

德宗貞元二年

壬午二十八年帝東巡上鄒嶧山立石頌功業封泰山立

石下禪梁父遂登琅邪立石遣徐市入海求神僊渡淮

浮江至南郡而還考異

提要書曰帝東巡立石鄒嶧山封泰山禪梁父遂遊海上求神

僊南渡江乃還

始皇東行郡縣上鄒嶧山立石頌功德魯儒生議封禪或曰古者封禪為蒲車惡傷山之土石草木掃地而祭席因菹醢議各乖異始皇以其難施用遂絀儒生而除車道上自山陽至顛立石頌德從陰道下禪於梁父封藏皆祕之世不得而記也遂東遊海上祠山川八神南登瑯邪作臺刻石初燕人宋毋忌羨門

子高之徒稱有仙道形解銷化之術自齊威宣燕昭王皆信之使人入海求蓬萊方丈瀛洲云此三神山在渤海中去人不遠患且至則風引船去嘗有至者諸仙人不死藥皆在焉至是方士徐市等上書言之請得齋戒與童男女求之於是遣市發童男女數千人求之船交海中皆以風為解曰未能至望見之焉始皇還過彭城齋戒禱祠欲出周鼎泗水使千人沒水求之弗得乃西南渡淮浮江至湘山祠逢大風幾不能渡上問湘君何神博士對曰堯女舜妻葬此始皇大怒伐楮其山遂自南郡山武關歸

集覽

泰山在泰安州北三里正義曰泰山一曰岱宗東嶽也在兗州博城西北三十里郭璞云從山下至山巔百四十八里三百步鄒嶧山索隱曰鄒魯之縣名山在其北正義曰國系云邾嶧山一名鄒山在兗州鄒縣南魯繆公改邾作鄒遂因縣名山按鄒山記云鄒山古之嶧山也封禪服虔曰封增土之高歸功於天

禪闢廣土地也張晏曰天高不可及於泰山上封禪而祭冀近神靈也瓚曰積土為封謂負土於泰山上為壇而祭之除地為壇祭於梁父後改壇曰禪神之矣祭尚玄酒而俎魚鴈皆廣長十二丈壇高三尺階三等而樹石泰山之上高二丈一尺廣三尺席因蒞階封禪書因作用如淳曰蒞本作蒞音租階讀曰憂說文蒞茅藉也階禾稊也去其皮以為席索隱曰周禮祭祀供茅蒞梁父瓚曰泰山下小山名也因以名縣屬泰山郡正義曰梁父在兗州泗水縣北八十里父音甫封藏凡封禪當用玉牒書藏方石有玉檢又用石檢十枚列於石旁檢用金繩纏以五周以水銀和金為泥封之印以受命之璽又有玉匱一長一尺三寸以藏上帝之冊金匱二以藏帝之冊山川八神劉貢父曰八神即封禪書所說一天主祠天齊二地主祠泰山梁父三兵主祠蚩尤四陰主祠三山五陽主祠之罘六月主祠之萊七日主祠成山八四時主

祠瑯邪或曰漢武時謬忌所言為壇開八通之鬼道
是也詳見封禪書作臺刻石索隱曰山海經云瑯邪
臺在渤海間蓋海畔有山其形如臺在瑯邪故曰瑯
邪臺括地志云今密州諸城縣東南有瑯邪臺春秋
越王勾踐徙都瑯邪立觀臺以望東海始皇所作臺
即勾踐起臺處宋無忌索隱曰樂彥引老子道德經
月中仙人宋無忌白澤圖云火之精曰宋無忌蓋其
人火仙也羨門子高羨祠箭反應劭曰羨門古仙人
也名子高張揖曰碣石山上仙人羨門高也紫陽真
人張義山聞有藥先生得道在蒙山乃追尋之蒙山
遇羨門子高乞長生要訣秦皇本紀作羨門高誓韋
昭曰羨門古仙人高誓亦古仙人疑韋說誤形解銷
化正義曰解佳買反尸解也張晏曰人老而解去故
骨則變化也集仙錄曰有死而形如生人者有死而
足不青皮不皺目光不落者有死而更生者有未斂
而失其尸者有髮脫而形飛者皆尸解也白曰解者

為上夜半解者為下向曉向暮解者為地下主以風
為解皆自解說遇風不得至彭城徐州所理縣州東
外城古彭國也搜神記陸終第三子曰錢鏗封於彭
即此欲出周鼎泗水封禪書周之九鼎入于秦或曰
宋太丘社亡而鼎沒于泗水彭城下漢文十六年新
垣平曰周鼎亡在泗水中於是治廟汾陰欲祠出鼎
徐廣曰是後三十七年鼎出汾陰又秦本紀周民東
亡九鼎入秦正義曰秦昭王取九鼎然一飛入泗水
餘八入於秦括地志云泗水源出兗州泗水縣東陪
尾山源有四道因名焉水至彭城呂梁東南入淮湘
山祠湘山在長沙下雋縣巴丘界湘中記云山在益
陽洞庭湖中即君山也括地志云黃陵廟在岳州湘
陰北舜二妃之神盛弘之荊州記云青草湖南有青
草山按湘山即此山也山近湘水廟在湖南故曰湘
山質實一統志云鄒嶧山在兗州府鄒縣東南二十
祠五里即嶧山也禹貢嶧陽孤桐春秋邾文公

卜遷於嶧史記秦始皇上鄒嶧山刻石頌功德皆此
泰山在濟南府泰安州北五里即東嶽岱宗也舜東
巡狩至此其山屈曲盤道至絕頂高四十餘里有石
表東嶽廟封禪壇梁父山名在泰安州東南一百一
十五里漢書以此山名縣瑯邪臺在青州府諸城縣
東南一百五十里瑯邪山越絕書勾踐徙瑯邪起觀
臺臺周七里以望東海又秦始皇登斯臺大樂之留
三月晉郭璞曰瑯邪臨海邊有山嵯嶢特起狀如高
臺此即瑯邪臺彭城秦之縣名屬泗水郡項羽自立
為西楚霸王都於此漢初改泗水為沛郡又分沛郡
立楚國置徐州後改為彭城郡晉於淮南僑立徐州
又分淮北為北徐州劉宋改北徐州曰徐州而加淮
南徐州曰南徐州後魏於徐州仍立彭城郡隋開皇
初郡廢復為徐州大業初改為彭城郡唐置徐州天
寶初復改彭城郡乾元初復為徐州後陞武寧軍宋
因之金屬山東西路元復為徐州本朝因之直隸

京師泗水源出兗州府泗水縣南流過沛縣至徐州城東北合汴水循城東南以達于淮昔周顯王時九鼎淪沒于泗秦城鼎氣浮于水上始皇使數千人沒水求之不獲謂之鼎伏即此君山在岳州府城西南一十五里洞庭湖中一名洞庭山狀如十二螺髻山海經云洞庭之山帝之二女居之蓋堯女湘君嘗居於此故名黃陵廟在岳州府瀟湘之尾洞庭之口前代立之以祠舜二妃者唐韓愈有碑蓋舜南巡崩葬蒼梧二妃從之不及溺死沅湘之間故人為立廟二妃世稱湘君

書法

凡巡譏也書遂譏忘反也綱目書巡二十九書辭之詳者三秦皇是年漢武元封元年隋

煬大業三年皆奢慾之尤者也是故始皇書遂再漢武書遂三隋煬書遂一於是史曰上鄒嶧山立石頌功德綱目書頌功業史曰上自山陽至巔立石頌德綱目止書立石再不書德削之也書封禪

始此自是書封禪者五君一后始皇是年漢武帝
元封元年太初元年光武中元元年唐高宗乾封

元年周武氏嗣聖十二年嵩少玄宗開元十三年
終綱目封禪六見上許而停者四唐太宗貞觀十

五年二十一年高宗弘道元年玄宗天寶九載終
不許者一隋文帝開皇九年書神仙始此終綱目

書求神仙三始皇是年漢武帝元光二年元封元
年書方士名十四徐市新垣平少翁樂大公孫卿

潘誕盧迦逸多鄭普思葉靜能張果周息元柳泌
趙真李玄伯娑婆寐但書天竺方士不與焉而罪

者一誅者七世
主亦可以鑒矣

發明觀綱目所書始皇遊覽立石頌功業之事洋
洋乎盛哉大書特書不一書而止非美之也

所以著其侈
泰之實云爾

癸未二十九年帝東遊至陽武韓人張良狙擊誤中副車

令天下大索十日不得遂登之罘刻石而還

初韓人張良五世相韓及韓亡良散千金之產弟死不葬欲為韓報仇始皇東遊至陽武博浪沙中良令力士操鐵椎狙擊始皇誤中副車始皇驚求弗得令天下大索十日或曰張良之計不亦疎乎程子曰欲報君仇之急何集覽之罘地志之罘山在東萊縣暇自為謀耶括地志云在萊州文登縣西北九十里封禪書山在濟北並渤海漢書音義曰之罘山在牟平縣罘房尤反陽武博浪沙中北志陳留陽武縣括地志云今鄭州陽武東北十八里漢陽武城也博浪沙在陽武南索隱曰今浚儀西北有博浪城按輿地要覽汴梁路延州陽武南有博浪沙亭是也漢書浪作狼亦音浪狙擊服虔曰狙音覲伺也應

劭曰狙伏伺也狙伺物必伏而擊之故凡伏而擊者曰狙擊

質實

一統志云之罘山名在萊州府

福山縣東北三十五里連文登縣界周圍五十里三面瀕海史記始皇二十九年登之罘刻石紀功即此郊祀志齊有八祠之罘為陽主漢武登之罘山聞稱萬歲其東南海水中有一石俗傳武帝造橋有兩石銘尚存陽武古地名秦為博浪沙之地漢始置陽武縣屬河南郡晉屬滎陽郡東魏屬廣武郡北齊省隋復置屬滎陽郡唐屬鄭州五代屬開封府宋元仍舊國朝因之改屬開封府博浪沙地名在開封府城北三十里一名博浪沙亭即張良令力士擊秦始皇處一云在陽武縣東南三里

書法

於是韓既滅矣書韓人何良之心未嘗無韓也故心在乎韓韓雖亡而張良書韓人心在

乎晉晉雖亡而陶潛書晉徵士心在乎唐唐雖亡而張承業書唐特進綱目一字之褒嚴矣書遊始

此終綱目書遊八是年辛卯年吳主皓晉成帝咸康元年趙王虎安帝元興三年燕主熙梁己亥年魏胡太后陳癸己年齊主緯五代乙酉年蜀王衍二危莫危於秦馬終綱目書大索十日二是年漢征和元年秦皇漢武一轍也

發明

張良以一布衣其視聶政荊軻等耳胡為不以盜書且是時天下已為秦矣又胡為復書

韓人哉良五世相韓志在報君之仇綱目予之故其書法如此然呂政是時鞭笞四海威振殊俗良乃欲狙擊而斃之既而大索弗獲詳書于冊亦足見良之為謀甚深而秦人亦無有為呂政同仇者嗚呼偶語者猶棄市而狙擊者乃獲免孰謂秦法果嚴哉

甲申
三十年

乙酉三十一年使黔首自實田集覽

自實田令民自具頃畝實數也

丙戌三十二年帝東巡刻碣石門壞城郭決隄防集覽

碣石

門晉太康地記樂浪郡遂城縣有碣石山秦築長城起於此又非禹貢碣石也徐廣曰門一作盟

質實

一統志云碣石山名在永平府昌黎縣西北二十里禹貢注云碣石在北平郡驪城縣西南河口之北今平州之南也酈道元言驪城縣枕海有石如甬道數十里當山頂有大石如柱石韋昭以為碣石舊在河口海濱歷世既久為水所漸淪入海已去岸百餘里矣今碣石在平州東離海三十里遠望其山穹窿似塚有石特出山頂其形如柱疑即禹貢冀州之碣石

書法

書譏私也後乎此唐莊宗亦有母得修城毀其守具之書而秦唐乃亡於長驅之兵也此

竟何益哉

○巡北邊遣將軍蒙恬伐匈奴

初始皇之碣石使盧生求羨門子高還奏得錄圖書曰亡秦者胡也始皇乃巡北邊遣將軍蒙恬發兵三十萬人北伐匈奴

丁亥三十三年略取南越地置桂林南海象郡以謫徙民

五十萬戍之考異

提要無謫徙以下八字

集覽

桂林漢武以其地置鬱林郡南海漢

南海郡即秦故郡也今廣州南海縣象郡漢武更名日南郡

質實

一統志云桂林秦之郡名本古百粵

之地秦置郡漢廢之以其地改屬零陵蒼梧二郡三國吳置始安郡屬荊州晉屬廣州梁兼置桂州隋復置始

安郡唐復為桂州治臨桂縣至德間改為建陵郡光化
間陞為靜江軍節度五代時屬南漢宋初仍為桂州後
陞靜江府元置靜江路國朝改為桂林府隸廣西道
南海秦之郡名春秋為南越之地秦於此置郡後為趙
佗所據漢討平之復為南海郡屬交州刺史東漢末遷
交州治番禺三國吳又遷交州治龍編而於此置廣州
梁陳並置都督府隋置總管府後改廣州曰番州大業
初又改南海郡唐復置廣州總管府陞大都督府天寶
初改州為南海郡乾元初復為廣州唐末置清海軍節
度宋為廣州清海軍大觀中陞為帥府元置廣州路
國朝改為廣州府隸廣東道象郡愚按此郡古南粵之
地秦初置之漢武析為交趾九真日南合浦等郡自漢
晉隋唐宋元以至於我朝歷代建置沿革不一難以枚
舉今廉州雷州等府及安南占城等國皆其故地載攷
一統之志俱無專指之處如廉州雷州等府只云秦為
象郡地安南占城等國只言屬象郡以此觀之何由知

其故蹟是以不敢妄為臆說以惑世之觀者倘因高明教焉謹當備錄補之

發諸嘗逋亡人及贅壻賈人為兵略取南越
陸梁地置三郡以謫徙民五十萬戍五嶺

集覽

贅壻

徐廣曰男無聘財以身自質於妻家曰贅索隱曰壻如人身之耽贅是餘剩之物陸梁地如淳曰在江南

正義曰嶺南人多處山陸間其性強梁故曰陸梁五嶺裴潛廣州記大庾始安臨賀桂陽揭陽是為五嶺

又陸德明南康記臺嶺今名大庾嶺桂陽騎田嶺九真都龐嶺臨賀萌渚嶺始安越城嶺唐書注云大庾

嶺在虔州永明嶺白芒嶺在道州臘嶺在郴州臨源嶺在桂州各有小異

書法

徙豪桀咸陽不書十二萬此書五十萬何為謫徙書也謫徙之民至五十萬刑濫可知矣

故特書之

蒙恬收河南地築長城

蒙恬斥逐匈奴收河南地為四十四縣築長城起臨洮至遼東延袤萬餘里暴師於外十餘年恬常居上郡之**集覽**河南地注見漢武帝元朔二年臨洮縣臨洮水故名臨洮屬隴西郡西魏改岷州隋唐改臨洮郡宋改**質實**一統志云臨洮秦之縣名屬隴西郡本古西羌之地漢晉俱因之西魏始置岷州及同和郡隋州郡俱廢以其地入臨洮郡後復置岷州唐因之天寶初改和政郡乾元初復為岷州治溢樂縣後陷於吐蕃宋收復祐川縣置岷州紹興初徙治長道縣之白石鎮改曰西和州屬利州路元祐川縣境復置岷州屬吐蕃等處宣慰都元帥府至本朝置岷州衛軍民指揮使司直隸陝西道都司

書法

譏私且勞民也書長城始此終綱目書長城十是年宋癸亥年魏梁癸亥年東魏梁壬申

年乙亥年丙子年高齊三書辛丑年乙巳年大業二年四年隋四書高齊重城不與焉枳關長城不

書不與焉梁丁

丑年癸未年

彗星見

書法

書記異也自是國無他變間三歲而始皇死天下亂是故秦之將興也彗見之周顯王八

年其將亂也彗復見之蓋以彗始終焉通鑑是歲不書彗見而綱目特書之其旨深矣

戊子
三十四年燒詩書百家語

始皇置酒咸陽宮僕射周青臣進頌曰陛下神聖平定海內以諸侯為郡縣無戰爭之患上古所不及始

皇悅博士淳于越曰殷周之王千餘歲封子弟功臣
自為枝輔今陛下有四海而子弟為匹夫卒有田恒
六卿之臣何以相救事不師古而能長久非所聞也
今青臣又面諛以重陛下之過非忠臣也始皇下其
議丞相李斯言五帝不相復三代不相襲今陛下創
大業建萬世之功固非愚儒所知且越言乃三代之
事何足法也異時諸侯並爭厚招遊學今天下已定
法令出一百姓當家則力農工士則習法令今諸生
不師今而學古以非當世惑亂黔首人聞令下則各
以其學議之入則心非出則巷議誇主以為名異趣
以為高率羣下以道謗如此弗禁則主勢降乎上黨
與成乎下禁之便臣請史官非秦記皆燒之非博士
官所職天下有藏詩書百家語者皆詣守尉雜燒之
偶語詩書者棄市以古非今者族吏見知不舉與同
罪令下三十日不燒黥為城旦所不去者醫藥
卜筮種樹之書欲學法令者以吏為師制曰可
集覽

僕射漢官儀云僕射秦官顏師古曰僕主也射本如
字讀古者重武事每官必有主射課督之故名焉今
射音夜蓋關中語轉為此音耳漢獻帝分置左右僕
射唐置左右匡正又改左右相田恒齊之世卿也簡
公為恒所弑又二世至康公恒曾孫和遷康公於海
濱卒有齊國是為威王六卿注見周威烈王二十三
年心非或讀非曰誹棄市索隱曰按禮云刑人於市
與衆棄之故今律謂絞刑為棄也黥為城旦黥墨刑
也注見周顯王十年如淳曰律說論決為髡鉗輸
邊築長城晝旦伺寇虜夜暮築長城城旦四歲刑

己丑 三十五年除直道

使蒙恬除直道道九原抵雲陽

集覽

除直道除治也
括地志云秦故

道在慶州華池縣西四十五里子午山上自九原至
雲陽千八百里道九原道由也地理志五原郡九原

縣正義曰九原在勝州榆林縣西界括地志云勝州連谷縣本秦九原郡今豐州是抵雲陽抵至也括地志云今京兆雲陽縣徐廣質實一統志云九原秦之曰表云道九原通甘泉縣名屬五原郡隋初改為豐州後改為五原郡唐復為豐州或為九原郡尋廢之故城在大同府城西北四百二十里雲陽秦之縣名屬京兆尹漢改屬左馮翊晉宋因之唐廢焉故城在西安府涇陽縣西北七十里

營朝宮作前殿阿房

始皇以咸陽人多先王宮廷小乃營朝宮渭南上林苑中先作前殿阿房東西五百步南北五十丈上可以坐萬人下可以建五丈旗周馳為閣道自殿下直抵南山表山巔以為闕複道渡渭屬之咸陽隱宮徒刑者七十餘萬人分作阿房驪山關中計宮三百關外四百餘因徙三萬家驪邑五萬家雲陽盧生說始

皇為微行以辟惡鬼所居宮母令人知然後不死之藥殆可得也始皇乃令咸陽旁三百里內宮觀複道相連帷帳鐘鼓美人充之各按署不移徙所行幸有言其處者死嘗從梁山宮望見丞相車騎衆弗善也或告丞相丞相損之始皇怒曰此中人泄吾語捕時在旁者盡殺之是後莫知行之所在羣臣受決事者悉於咸陽宮

集覽

阿房初秦惠文王作宮阿基房未成而亡始皇廣其宮規恢三百餘里房一作

旁或讀如房室之房阿曲也言殿之四阿皆為房一說大陵曰阿言殿高若於阿上為房正義曰房白郎反括地志云阿房宮亦曰阿城在雍州長安西北二十四里宮在上林苑中雍州郭城西南面即阿房宮城東面也顏師古曰阿近也以去咸陽近故號焉索隱曰此以其形名宮也言其宮四阿旁廣也隱宮宮淫刑也男子割勢婦人幽閉次死之刑正義曰餘刑見於市朝宮刑一百日隱於陰室養之乃可故曰隱

宮下蠶室是也徒刑徒奴役也以罪供徃作分作阿
房驪山史記分作阿房宮或作驪山索隱曰驪山在
雍州新豐南古驪戎國驪舊音黎徐廣曰音力知反
微行張晏曰若微賤之所為故曰微行宮觀宮至尊
所居之稱也觀猶象魏闕也古者每門樹兩觀於
其前所以標表宮門登之則可徧觀故謂之觀正
誤微行今按說文微隱行也質實一統志云阿房宮名在西安府咸陽縣東二十五里秦始皇建

於渭南上林苑中驪山在西安府臨潼縣東南二里
因驪戎所居故名山之麓溫泉所出唐玄宗更名昭
應上有老母廟山左肩曰東繡嶺右肩曰西繡嶺梁
山宮在西安府永壽縣南八十里秦始皇建宮城皆
文石亦名織錦城又始皇遊梁山宮見丞相李斯車騎衆即此

阮諸生四百六十餘人使長子扶蘇監蒙恬軍

侯生盧生相與譏議始皇因亡去始皇聞之大怒曰
諸生或為妖言以亂黔首使御史按問之諸生傳相
告引乃自除犯禁者四百六十餘人皆阮之咸陽長
子扶蘇諫曰諸生皆誦法孔子今以重法繩之臣恐
天下不安始皇怒使
北監蒙恬軍於上郡

書法

秦所以亡以立少子胡亥也胡亥所以得立
以長子扶蘇在外也扶蘇所以在外以諫阮

儒生也然則秦亡之禍自阮儒始天道亦昭昭
哉綱目著秦亡之本以為後世戒故特書長子

發明

詩書非可燒也而燒之諸生非可阮也而阮
之天醜其為滅亡著矣故繼書使長子扶蘇

監蒙恬軍以見扶蘇因諫而逐所以著其自取滅
亡之實使扶蘇尚在左右則趙高邪謀胡亥襲位
之事何自而萌哉下書隕石東郡及載所刻之語
天誅之意尤明而乃盡殺石旁居人庸可免乎

庚寅 三十六年隕石東郡集覽

東郡注見漢光武建武八年

有隕石于東郡或刻之曰始皇死而地分使御史逐問莫服盡誅石旁居人燔其石

書法

曹魏之世張掖涌石文曰大討曹漢後主建興十三年而魏不久亡於是或刻之曰始皇

死而地分則人力也越明年而言亦驗蓋雖人力而有相之道矣終綱目書隕石十二是年漢武帝征和四年元帝建昭元年成帝建始四年陽朔三年鴻嘉二年元延四年哀帝建平元年再書平帝元始二年殤帝延平元年桓帝延熙七年

辛卯 三十七年冬十月帝東巡至雲夢祀虞舜上會稽祭

大禹立石頌德秋七月至沙丘崩丞相李斯宦者趙高

矯遺詔立少子胡亥為太子殺扶蘇蒙恬還至咸陽胡

亥襲位九月葬驪山考異

提要無立石頌德矯遺詔七字扶蘇下有及字

十月始皇東巡少子胡亥丞相李斯從至雲夢望祀
虞舜于九嶷山浮江下渡海渚過丹陽至錢塘渡浙
江上會稽祭大禹望于南海立石頌德北至瑯邪之
罘西至平原津而病始皇惡言死羣臣莫敢言死事
病益甚乃令中車府令行符璽事趙高為書賜扶蘇
曰與喪會咸陽而葬未付使者七月始皇崩於沙丘
秘不發喪棺載輜涼車中所至上食奏事如故獨胡
亥趙高與幸宦者五六人知之初始皇尊寵蒙氏恬
任外將毅常居中參謀議名為忠信趙高者生而隱
宮始皇聞其強力通獄法以為中車府令使教胡亥
決獄嘗有罪使毅治之當死始皇赦之高既雅得幸
於胡亥又怨蒙氏乃與胡亥謀詐以始皇命誅扶蘇

而立胡亥為太子胡亥然之高曰不與丞相謀恐事不成乃見李斯曰上賜長子書及符璽皆在胡亥所定太子在君侯與高之口耳事將何如斯曰安得亡國之言此非人臣所當議也高曰君侯材能智慮功高無怨長子信之孰與蒙恬斯曰皆不及也高曰長子即位必用恬為丞相君侯終不懷通侯之印歸鄉里明矣胡亥慈仁篤厚可以為嗣願君審計而定之斯以為然乃相與矯詔立胡亥為太子更為書賜扶蘇數以不能立功數上書誹謗怨望而恬不矯正皆賜死扶蘇發書泣欲自殺恬曰陛下使臣將三十萬衆守邊公子為監此天下重任也今一使者來安知其非詐復請而死未暮也扶蘇曰父賜子死尚安復請即自殺恬不肯死繫諸陽周更置李斯舍人為護軍還報胡亥欲釋恬會毅出禱山川還高曰先帝欲立太子久矣而毅以為不可乃繫諸代遂從井陘九原直道至咸陽發喪胡亥襲位是為二世皇帝九月

葬始皇帝於驪山下錮三泉奇器珍怪徙藏滿之令匠作機弩有穿近者輒射之上具天文下具地理後宮無子者皆令從死工匠為機者皆閉之墓中二世欲遂殺蒙恬兄弟兄子子嬰諫曰蒙氏秦之大臣謀士也一旦棄之而立無節行之人是使羣臣不相信而鬪士之意離也弗聽恬曰吾積功信於秦三世矣今將兵三十餘萬其勢足以倍畔然自知必死而守義者不敢辱先人之教以不忘先帝也乃吞藥自殺司馬公曰秦始皇方毒天下而蒙恬為之使其不仁可知矣然明於為人臣之義雖無辜見誅能守死不貳斯亦**集覽**

雲夢禹貢蔡氏傳曰雲夢澤名禮夏官職方氏荊州其澤藪曰雲夢方八九百

里跨江南北華容枝江江夏安陸皆其地也索隱曰雲夢是二澤名人以二澤相近或合稱雲夢耳左傳桓四年邲夫人使棄諸夢中言夢而不言雲定四年楚子濟江入于雲中言雲而不言夢正與禹貢合漢

陽圖經云雲在江北今王沙監利景陵等縣是夢在江南今公安石首建寧等縣是也今德安府有雲夢縣九疑山在零陵蒼梧之間疑似也山有九峯其形相似遊者疑焉故曰九疑按九峯一朱明二石城三石樓四娥皇五舜源六女英七簫韶八桂林九梓林太史公曰舜南巡狩死於蒼梧之野歸葬江南之九疑皇覽云舜冢在零陵郡營浦縣海渚始皇本紀注括地志云在舒州同安縣東正義曰按舒在江中疑海字誤愚謂古舒州去江西北百二十里云在江中亦非丹陽始皇本紀注括地志云丹陽郡故在潤州江寧縣東南秦以為鄣郡浙江韋昭曰在錢塘南浙音折晉灼音逝非也蓋其流東至會稽山陰縣而西浙故吳會之地因以稱浙莊子所謂剡河即其水也剡浙聲相近會稽晉灼曰會稽山本名茅山禹巡天下登茅山會諸侯計功因名會稽會計稽考也秦置郡山在今越州會稽縣東南十二里平原津平原地

名水經云濁河東北過高唐按高唐即平原在河西
漢置平原郡屬青州今德州是中車府令行符璽事
中車府令秦官伏儼曰主乘輿路車兼行符璽令事
輜涼車文穎曰卧車也後因載喪飾以柳翳遂為喪
車之屬涼一作輶孟康曰輜涼本輜重之車謂之庫
車有牕牖閉之則溫開之則涼故名輜涼通侯應劭
曰舊曰徹侯徹通也言其上通王室也史避漢武諱
故曰通侯又改曰列侯陽周徐廣曰縣屬上郡正義
曰今寧州羅川縣漢陽周縣也錮三泉徐廣曰錮鑄
塞也顏師古曰三泉三重之泉也徙藏滿之劉伯莊
曰徙府藏之物以充滿冢中也徙死杜預白以人葬
為殉也秦法君葬以人從死至獻公元年始除此法
質實一統志云雲夢澤名在德安府安陸縣南五十里史記司馬相如傳云楚有七澤其小者名雲
夢方九百里左傳云邲子之女棄子於夢中又云楚
子濟江入雲中禹貢曰雲土夢作乂是雲夢本二澤

雙舉曰雲夢九疑山在永州府寧遠縣南六十里晉郭璞云其山九谿皆相似或云九峰參差互相隱映望而疑之故名峰各有一水四水流灌於南海五水北注於洞庭丹陽秦之縣名屬鄣郡漢初屬會稽郡後屬吳郡晉屬毘陵郡後廢之梁復置改屬蘭陵郡隋初陞為簡州唐初廢之復置丹陽縣宋元俱仍舊本朝因之改屬鎮江府錢塘秦之縣名屬會稽郡漢為會稽西部都尉治所東漢縣省晉復置屬吳郡陳於此置錢唐郡隋為杭州治唐改唐為塘宋元仍舊本朝因之改屬杭州府浙江在杭州府城東三里舊志出歙縣玉山其水經建德合婺溪過富春為浙江入于海江口有山居江中潮水投山十折而曲故云浙江盧肇曰浙者折也蓋取潮水出海屈折倒流也會稽山名在紹興府城東南一十二里揚州之鎮山也史記注禹到大越上茅山爵有德封有功更名會稽山海經曰會稽山上多金玉下多瑛石白玉土經

云山周迴三百五十里有陽明洞一名極玄太元之
天即三十六洞天第十一也平原秦邑名屬齊郡
漢置平原縣為平原郡治所東漢改郡為國後魏徙
郡治聊城而於縣置東青州尋廢州以縣屬安德郡
隋屬冀州尋改屬德州唐屬齊州尋復舊屬五代宋
金元俱仍其舊本朝因之改屬濟南府沙丘臺名注
見周赧王十七年陽周古地名春秋時為義渠所居
地戰國時屬秦漢置陽周縣屬上郡後魏於此置泥
陽惠涉二護軍後置陽周郡隋改為羅川縣屬寧州
唐天寶初於此獲玉真人像復更名真寧縣宋金元
俱仍其舊本朝因之改屬慶
陽府故城在縣北三十五里

書法

始皇於是六書刻石矣好大自伐未有甚於
始皇者也然則前不書頌德此則曷為書之

識也書德則何以為識立石於會稽是欲與禹較
德也故特書識之○賀善贊曰始皇自并天下以

來所書二十一事書更號書除謚書改正書封禪
書刻石志自伐也書銷兵器徙豪桀書壞城郭決
隄防書築長城書黔首自實田志自私也三書築
宮再書治道志土木也書伐匈奴書取南越地志
窮贖也五書巡遊志游觀也書焚詩書書阮諸生
志狂悖也書彗見書隕石志殃罰也自更號至此
無一善足以裕後昆者再世而亡晚矣○謀矯立
者趙高也曷為首李斯斯相也故首罪之前書矯
立胡亥為太子則下書太子即位者恒也其止曰
胡亥何不予胡亥之為太子也故書襲位若曰襲
而取之云耳綱目書襲位胡亥一人而已矣書官
者始此書遺詔始此終綱目書受遺詔六漢武帝
後元二年宣帝黃龍元年後主建興元年晉元帝
永昌元年明帝太寧三年唐太宗貞觀二十三年
舍是無書
矯者矣

發明

矯立之謀發於趙高而首書李斯者斯為大臣國柄在手不當徇宦者之請故首惡必歸

於斯也胡亥之立必書少子既為太子不書即不特曰胡亥襲位者不予其矯詔自立也夫秦固不

足道也詳而書之不沒其實姑以示亂亡之禍遺臭萬世而已

御批資治通鑑綱目卷二上

謹案第十三頁前四行河外者河南岸也魏州地
按唐魏州屬河北道此州字衍

第二十二頁後八行杜預曰徐云在江夏按杜預
曰下當有漢東之隘道五字


第三十四頁後六行恐不能須也按本傳作須臾
第三十六頁前六行過直沽入于海刊本直沽訛
沽直據明地理志改

第四十七頁前八行憲宗元和十三年刊本憲訛

顯今改

第五十五頁後五行臨賀萌渚嶺刊本渚訛浩按
水經注萌渚嶺亦稱萌渚嶠即古臨賀嶺又名
白芒嶺今名桂嶺無所謂萌浩嶺者今據改

第五十七頁後五行畫旦伺寇虜夜暮築長城城
旦四歲刊本伺訛司又脫一城字據漢書注
增改



總校官庶吉士臣張能照

校對官檢討臣郭寅

謄錄監生臣陳熙